

定興鹿氏二續譜

第八冊

上海图书馆

登记号码

SP 00000002

定興鹿氏二續譜卷十三



十六世孫傳霖敬輯

傳狀上

謹案 忠節公以理學純儒身殉城難明史列
傳敘次綦詳且於 光祿公 太公 解元公
三世忠直孝義之行一一備載而 壯節公都
勻之難闔門就義慷慨捐生大節炳然書之
國史此外方志之紀載私家之著述與夫學案
事實及先世行狀凡可與史冊相輝映者廣事

蒐輯謹以世次爲序所採旣多乃分二卷至於
祠墓之碣銘幽之文各以類附茲不錄焉

定興縣舊志義行傳

鹿侍御封翁名府號龍江忍柔多隱德里有悍少年
門前醉罵閉戶靜聽戒家人勿譁家人不能平欲以
理說曰彼此時純以酒用事醒當自愧耳翼日來謝
過封翁曰吾固料汝之無他竟不與較侍御登第之
年家人糶豆種鄉閭爭糶之因雨小未芽糶者以爲
敗種也毆至門詈辱之一一倍償其價後雨足芽生

苗且淳然家人輩欲送之官封翁曰吾家今年得第
便有此舉人且謂我倚勢也終不較

定興鹿丘二續前

卷十三

二

定興縣新志義行傳

鹿府號龍江侍御史久徵之父柔忍多隱德里有惡少年門前醉罵閉戶戒家人勿譁家人不能平欲以理論之府曰彼此時純以酒用事醒當自愧耳翼日來謝過封翁曰吾固料汝無他竟不與較有義事則勇爲之

定興鹿田
續詩

卷十三

三

大清一統志人物傳

鹿久徵字子誠定興人萬厯中進士知息縣有惠政擢御史神宗以軍政事貶斥臺省三十餘人久徵抗疏論救謫澤州判官遷滎澤知縣未任而卒

畿輔通志列傳

鹿久徵字豫軒定興人萬曆八年進士初任息縣時有均田之詔部使者令諸屬各署上中下壤獨息盡以下田報批駁四五至面嚙讓之久徵歎曰是紆民乃蹙民乎持初議不移得無加賦息田故額二萬八千頃以履畝占隱畢出溢四千餘頃則盡以見賦通攤之田乃大均再涖襄垣襄歲荐饑流亡者衆前令以逋賦責存者久徵按籍開除懸額七百戶存者以蘇流亡復業擇諸生材美者課藝授餐貧不能婚者

爲擇配資給之以治最擢御史時上敕百官修省久
徵謂天之怒不專在百僚回天之政不專在靡文陳
修省之實三事曰省聖躬禁酷吏恤民隱上納之及
按蘇松興革十六事悉中機宜神宗因軍政事移怒
南北臺省斥三十餘人久徵適服除還上疏申救其
詞曰古聖帝明王愛惜人才爲社稷計也軍政考察
不當斥兵科諸給事足矣並各科斥之又並各道御
史斥之何也謂不言耶聞多向之敢言者謂目擊時
事不言耶聞多奉差在外者是皇上以不言爲罪之

名而以言爲罪之實耳何以示天下後世乎且九卿
連名之疏非國家大事不舉非甚不得已之事不再
舉至如閣臣揭不行則疏疏不行則人各一疏豈皆
故私諸言官哉誠不忍坐視君父之舉動已甚而諄
諄懇懇以冀回天於萬一也夫一時逐去科道三十
餘人二百餘年所罕有部院閣臣進言乃不但拒之
又從而甚之尤二百餘年所罕有也夫臺省無可容
之言官廟廊無可信之元臣則主勢孤於上羣情疑
於下矣皇上縱不願言官不願大臣獨不願社稷乎

臣等豈不知罪之不可叢而反覆思維皇上留臣等
非以備員尸位而以補過拾遺也知而不言與畏而
不言失職之中又失職焉甯獨有愧言者其愧去者
亦遠矣疏入謫澤州判而直聲動中外尋歸里杜門
謝客教子孫讀書泊如也天啓朝贈光祿寺少卿

定興縣舊志列傳

鹿久徵字子誠江村人縣令岳公相器異於逢掖中
謁送必儀門萬厯庚辰登第授息縣令時清丈天下
田定上中下格久徵報息田皆下藩司勒如格堅稱
原無堪上中者請而駁駁而請至四藩司不能奪六
越月艱歸息民頌碑屹立矣復補襄垣奇荒異政茶
蓼自將五年如一日嘗謂吾所爲不必語人語人必
不信然亦不必人信吾安吾心耳選授御史人不敢
干以私亢早上飭百官修省久徵謂天之怒不專在

百僚回天之政不專在靡文陳修省之實三事省聖躬禁酷吏恤民隱上納之尋丁外艱復補江西道時倭數警經略宋應昌不展一籌被代獻倭圖倭器意懷觀望久徵疏斥乃倉皇去及按蘇松興革十六事各中機宜比代還會上以司馬曹軍政事移怒南北臺省斥三十餘人馬侍御經綸有言亦鐫職且嚴諭閉來者久徵仍毅然疏救辭激切蒙譴判澤州由是直聲動中外從謫所旋里杜門謝客教子孫讀書泊如也當事者疏薦無慮十數銓部請召還不得後乃

有榮澤之擢搆疾不起久徵平生室無旁媵門無狎
友雅與范奉政一泉善俱諸生時郡守某政聲狼藉
顧貌類公范戲以相擬公笑曰吾形其形不心其心
其終身品概券此語子正孫善繼曾孫化麟各有傳
祀鄉賢

定與用日二續詳

卷十三

九

定興縣新志列傳

鹿久徵字豫軒萬厯庚辰進士初任息縣時有均田之詔部使者令諸屬各署上中下壤獨息盡以下田報批駁四五至面嚙讓之久徵歎曰是紓民乃蹙民乎持初議不移得無加賦息田故額二萬八千頃以履畝占隱畢出溢四千餘頃則盡以見賦通攤之田乃大均再泄襄垣襄歲荐饑流亡者衆前令以逋賦責存者久徵按籍開除懸額七百戶存者以蘇流亡復業擇諸生材美者課藝授粢貧不能婚者爲擇配

資給之以治最擢御史時上敕百官修省久徵謂天之怒不專在百僚回天之政不專在靡文陳修省之實三事曰省聖躬禁酷吏恤民隱上納之及按蘇松上興革十六事悉中機宜神宗因軍政事移怒南北臺省斥三十餘人久徵適服除還上疏申救詞激切被謫澤州判由是直聲動中外尋歸里杜門謝客教子孫讀書泊如也當事者疏薦十數後有榮澤之命搆疾不起祀鄉賢

定興縣舊志列傳

鹿正字以道諸生以子善繼貴累封太常寺少卿方
嚴有道骨浼視寵利醉心於忠義節烈子善繼以金
花被譴喜動顏色天啓中閹禍熾羅織海內正人如
周魏左皆子莫逆交三家子弟賓客往來正皆左右
之且釀金佐誣賊義聲載路或爲正危不顧曰吾豈
惜一身爲吾子蘭譜辱哉正爲名侍御子居家布袍
素履奉母孺人踰耄正亦七十矣尙孺子慕制辭有
云乃父寢疾三年未解衣裾爾母孀居一日不離左

右可謂孝矣其高節懿行不勝書

鄉賢事實

一正係明祀鄉賢御史建言褒贈光祿寺少卿久徵
之子方嚴有道骨雙眸炯碧望之如神仙中人浼
視寵利醉心於忠孝節烈逆璫時傾身急左魏諸
君子之難海內競傳爲鹿太公云

一父侍御公寢疾躬視湯藥衣不解帶者三年常一
夕數起假寐几榻閒微聞侍御欠伸狀卽屏息而
俟早夜禱瘳頭鬢爲白其侍母夫人日夕依戀率

子孫輩稱觴戲綵備極愛日之誠其制辭有云乃
父寢疾三年未解衣裾爾母孀居一日不離左右
紀實也入志

一丁內艱年逾七十矣猶寢苦三載弗飲酒弗茹葷
哭泣如禮終身之慕殆謂是與

一篤念手足克盡怡怡與弟直友歡花萼嚶鳴垂白
無閒其孝友蓋出於天性云

一蠲貲助修學宮一瓦一椽竭心血爲湊辦漏者葺
之腐者易之頽者立之圯者新之經營凡四閱月

廟貌煥然詳縣志

一左忠毅光斗魏忠節大忠周忠介順昌皆奉常死
友左魏觸逆璫魏忠賢矯旨逮問誣坐左公賊二
萬魏公賊五千奉常時在關正與孫化麟開北海
亭內兩家子弟冒炎蒸策蹇醵金於好義者冀完
賊可免慷慨發舒千里響應時網羅密布而醵金
應比聲闕長安有爲正危者毅然不顧第曰七十
老人籌此已熟不知命無以爲君子生平豔殉義
死豈肯惜一身爲吾子蘭譜辱哉未及完左魏斃

杖下仍散前所贖金有不肖入者欲以賄左公未
得便而周公順昌又逮時奉常已家居力謀救之
卒不獲順昌亦死卽以前所餘金爲斂資更爲貸
百五十金俾其所親護喪歸於是奉常父子祖孫
義問塞天壤然竟不及禍天實爲之有魏孝子學
泚呈太公百韻及歸安茅元儀乙丙紀事戴司農
明說爲繪乾坤北海亭圖而繫以詩並詳縣志
一嘗偕容城孫孝廉奇逢過闕里謁孔林徘徊瞻
注曰我輩爲聖人之徒不一履其居展其墓得無

令端木氏笑人也嚮往尼山可覘篤摯

一崇禎己巳京師戒嚴豫撫范景文帥師入衛憂餉
缺正倡義助之行誼素孚人皆響應得米數百斛
士氣以振

一割腴田數十畝代合族貼軍令子善繼移呈邑令
畢公自肅印批以垂永久沐義者勒石紀之

一鰥居日尙未逾壯太常欲擇一侍子奉起居不許
且曰若以而翁爲苦耶吾自覺無不足處風雨蕭
然彌發嘯詠聞者莫不歎爲真丈夫故制詞有梁

案久塵溫臺永閉之句

一生平以勤儉持家而卹人之急甚於己當厄之與甯直無難色恆慮人有難盡之言每曲意先之中表劉正心以一言之諾贍其妻子終身爲娶婦二嫁女二蓋慷慨好施自天性云

一素性樸簡一切聲色服御玩好之物不交於目嘗謂生不能挽流俗而席祖父以自張藉子孫以自奉此其人殊堪嗚噦阜綈草履菽食菜羹老而不厭年八十出入徒步里閭中士論高之

一庭訓以聖賢勸課子弟奉常自幼未常北面塾師而業就卒爲一代大儒方奉常借發金花被謫馳書諭云官無不止之日只要止其所當止乃不負爾祖爾奉常筦鑰時立章程當面兌領銀不入庫吏勿得上下其手官乃盡絕羨餘正知之掀髯曰是真清白吏子孫哉迄奉常仗義靖節正聞變於容城援筆諭孫化麟曰汝父求仁得仁死亦何恨而化麟卒以毀歿其自處與爲子若孫處者無論富貴於生死之關又何如也逸史茅元儀輓詩曰

忠臣孝子兩兒孫雖人各自立而醴泉芝草厥有
淵源矣高節懿行不勝書

定興鹿田二續譜

卷十三

四

定興縣新志義行傳

鹿正字以道久徵之子善繼父也諸生天啓中魏闖勢熾羅織海內名人魏大中左光斗周順昌皆善繼莫逆交三家子弟往來營救正皆左右之釀金代償義聲載路旁觀者危之曰老夫籌此已熟不知命無以爲君子也善繼以守城死正曰嗟乎吾兒素以身許國今果死吾復何憾

								<p>以其為禮亦備</p>
--	--	--	--	--	--	--	--	---------------

孫奇逢鹿太公傳

太公名正號成字侍御豫軒公長子太常伯順父也
侍御宦游公拮据家務一意以明農課子爲己任故
侍御公無憂內顧太常未嘗北面一塾師而業就生
平勤儉持家卹人之急甚於己當厄之與甯直無難
色恆慮人有難盡之言也公表弟劉正心以一言之
諾養其妻子終身爲之娶婦者二嫁女者二蓋慷慨
好施自其天性與人不設城府不歧面背臨事嶄然
有斷性簡樸聲色服御去之若浼惟孝友節義以此

自律並以誨人侍御公寢疾躬侍湯藥衣不解帶者
三年嘗一夕數起假寐几榻間微聞侍御欠伸狀卽
屏息而俟早夜禱瘳頭鬢爲白其侍母夫人日夕依
戀伯順嘗一再迎養京邸席未煖而歸裝是東曰奈
何戀游子而牽堂上老人遠思也七十歲居母喪猶
寢苦食淡哭泣如禮終身之慕殆謂是與篤念手足
與弟直友歡垂白無閒鰥居日伯順欲擇一侍子奉
起居公不許曰若以而翁爲苦耶吾自覺無不足處
且此事早已看破固無一可者風雨蕭然彌發嘯詠

性不解飲而雅好客流連下榻丙夜不倦客或請少
休則謂君豈以老夫爲醒眼君輩舉爵吾汨汨亦若
有酒腸也枯棋三百拉一二同調槃礴其閒竟日對
壘並忘勝負制詞有溪山寄傲覺海鷗猶有機心木
石與居笑雲鶴仍無定性得公神矣恩命三錫年登
八旬每出入安步閑中卽往返百餘里亦止一僕一
騎無異布衣時曰吾幸未憊庶幾與里閭故舊遇諸
塗何可使其引避而轍迹畏人將無挾兒輩尊寵於
車上儻哉有司至門恆踰垣以避歲請鄉飲始勉一

赴後絕不往孫化麟中辛酉解元製一褐袍伯順自
塞上歸一裘爲壽公復嚴戒之嘗謂生不能挽流習
而席祖父以自張藉子孫以自奉此其人殊堪嗚噉
蓋公以高風古韻生平爲王彥方陳太邱逾四十年
鄉里蒸蒸何論家庭閒矣至天啓中璫禍起網羅密
布一時如左魏周諸君子皆伯順密友俱遭禍三家
子弟賓客絡繹江村謀所以爲左右力公挺身周旋
不計禍患甚至醵金應比聲闕長安旁觀者代爲公
危公不顧第曰老人籌此已熟矣不知命無以爲君

子我肯惜一身爲吾子蘭籍辱崇禎朝己巳之變范
撫軍入援公湊粟五百餘石犒師嘗割腴地數十畝
代合族貼軍其仗義急公類如此當伯順發金花落
職後復從高陽相國督師渝水人皆爲公慰且危公
獨掀髯長笑曰臣子不當如是耶持祿養交非吾子
事且如先侍御抗言大節何迄伯順殉難猶毅然曰
得其死矣世受國恩可借此以報九廟之靈亦復何
恨觀此公所自處與爲子處無論富貴於生死又何
如也公嘗擁五世於一堂人倫之盛海內寡二後以

孫化麟爲父叩闈悴死終不勝鬱痛以歿海內聞而
悲之乃余猶不能無憾余於公以猶子侍乃不督過
若以孺子可教也歲時風雨譚塵棊枰遇余必色飛
卽忿怒激切時徐出一言無不立解不知何以得此
於公也余交伯順四十年公四十年如一日後子孫
之殞及公病以迨屬續余無一時不侍左右屢欲爲
傳顧痛不能屬筆聊述其概如此亦承公之素命也

李光地書鹿太公家傳後

班固謂四豪者五霸之罪人也漢之俠者又四豪之罪人也豈非謂其赴難死黨而不軌於義無益於公與東京之季倚乎公義矣然亦有徇聲挾氣爲之者不根於忠懇之誠不出於醇厚之德則於儒者之行猶遠故論之者曰一變至道也鹿氏父子祖孫粹然儒者其服官居鄉潔修亮節暨乎投難死毀代有傳紀太公則介乎其間終身不仕頽然若一耕夫耳當魏忠賢糜滅善類之際中外仰息回燄濺波靡不焦

爛於斯時也能爲申屠太邱之事亦庶幾賢矣而太公護持營救歸骨收孤曾不慮吹毛之及已卒以誠心厚德神之相之雖有害幾莫之能發此其所處較諸古人不亦優乎或曰不在其位而犯其難於中道概乎余曰不然國步方艱食土者皆君臣也嫠猶恤宗周之闕况公之父子皆朝列非遯荒出逃者比詩曰相彼投兔尙或先之行有死人尙或瑾之觀其佐父以清直而勛子以勤瘁直至視其子孫殞身以殉忠孝而悲慰交曾大義慨然則公之平生其非逐名

矯節而無忤於聖賢也決矣其諸隱德細行具傳中
不悉論茲特論其大者以風焉

定與唐且二續譜

卷十三

三

此譜就其首末六方以爲一河
通而無別然其與山火與并前編無異才與前中

明史列傳

鹿善繼字伯順定興人祖久徵萬厯中進士授息縣知縣時詔天下度田各署上中下壤息獨以下田報曰度田以紓民乃病民乎調襄垣擢御史以言事謫澤州判官遷滎澤知縣未任而卒父正苦節自礪縣令某欲見之方糞田投鍤而避急人之難傾其家不惜遠近稱鹿太公善繼端方謹愨由萬厯四十一年進士授戶部主事內艱除起故官遼左餉中絕廷臣數請發帑不報會廣東進金花銀善繼稽舊制金花

貯庫備各邊應用乃奏記尙書李汝華曰與其請不發之帑何如留未進之金汝華然之帝怒奪善繼俸一年趣補進善繼持不可以死爭乃奪汝華俸二月降善繼一級調外汝華懼卒補銀進泰昌改元復原官典新餉連疏請帑百萬不報天啓元年遼陽陷以才改兵部職方主事大學士孫承宗理兵部事推心任之及閱視關門以善繼從出督師復表爲贊畫布衣羸馬出入亭障聞延見將卒相勞苦拓地四百里收復城堡數十承宗倚之若左右手在關四年累進

員外郎耶中承宗謝事善繼亦告歸先是楊左之獄起魏大中子學洪左光斗弟光明先後投鹿太公家太公客之與所善義士容城舉人孫奇逢謀持書走關門告其難於承宗承宗善繼謀借巡視薊門請入覲闈黨大譁謂閣部將提兵清君側嚴旨阻之獄益急五日一追賊擄掠甚酷太公急募得數百金輸之而兩人者則皆已斃矣至是善繼歸而周順昌之獄又起順昌善繼同年生善繼又爲募得數百金入而順昌又斃闈黨居近善繼家難家子弟僕從相望

於道太公曰吾不懼也崇禎元年逆璫既誅善繼起
尙寶卿遷太常少卿管光祿丞事再請歸九年七月
大清兵攻定興善繼家在江村白太公請入扞城太
公許之與里居知州薛一鶚等共守守六日而城破
善繼死家人奔告太公太公曰嗟乎吾兒素以身許
國今果死吾復何憾事聞贈善繼大理卿諡忠節敕
有司建祠子化麟舉天啓元年鄉試第一伏闕訟父
忠踰年亦卒

贊曰士大夫致政里居無封疆民社之責可遜迹自

全非以必死爲勇也然而慷慨捐軀冒白刃而不悔
湛宗覆族君子哀之豈非名義所在有重於生者乎
氣節凜然要於自遂其志其英風義烈固不可泯沒
於宇宙間矣

欽定鹿田二經講

卷十三

三

[Faint vertical text columns, likely bleed-through from the reverse side of the page]

明史彙列傳

鹿善繼字伯順定興人祖久徵萬曆中進士授息縣知縣時詔天下度田各署上申下壤息獨以下田報上官屢卻之執如初且核隱占田四千餘頃調襄垣擢御史帝以軍政事貶黜言官三十四人久徵抗疏申救亦謫澤州判官遷滎澤知縣未任而卒父正急人患難傾其家不惜遠近稱鹿太公善繼端方謹慤少讀王守仁書慨然有必爲聖賢之志鄙章句薄溫飽不與俗浮沈舉萬曆四十一年進士授戶部主事

內艱除起故官遼左餉中絕廷臣數請發帑不報會
廣東進金花銀善繼稽舊制金花貯庫備各邊應用
乃奏記尙書李汝華留以給餉帝怒奪善繼俸一年
令補進善繼以死爭乃奪汝華俸三月降善繼一級
調外汝華懼卒補銀進泰昌改元復原官典新餉連
疏請發帑百萬不報天啓元年遼陽陷以才改兵部
職方主事爲尙書崔景榮草疏請罪且請逮治逃將
御史游士任馬逢皋有所庇詆善繼爲小臣善繼憤
抗疏曰臣等固小臣御史獨大臣乎御史橫朝端而

曹郎昌言常居其半人各有品安可輕也疏上卽日出署帝不許時言路勢張善繼獨與抗高攀龍薦善繼剛毅肯任事請以職方兼御史督輦下保甲教民忠義得旨允行竟不果大學士孫承宗理兵部事推心任之及閱視關門以善繼從出督師復表爲贊畫杜饋遺絕宴會布衣羸馬出入亭障閒延見將卒與相勞苦承宗倚之若左右手其拓地四百里收復數十城堡善繼籌畫爲多在關四年屢進員外郎郎中及承宗謝事善繼亦移疾歸崇禎元年起尙寶卿遷

太常少卿管光祿丞事甫三載復請告歸家居與門人講學從游者日衆九年七月

大清兵攻定興善繼時居江村長吏請入城與里居知州薛一鶚等共守親故交阻之不聽固守六日城破不屈死家人奔告其父父慨然曰吾兒素以身許國今何憾乎事聞贈大理卿諡忠節敕有司建祠子化麟舉天啓元年鄉試第一伏闕訟父忠踰年亦卒

大清一統志人物傳

鹿善繼字伯順久徵孫父正急人患難傾其家不惜
遠近稱鹿太公善繼端方謹慤少讀王守仁書慨然
有必爲聖賢之志不肯與俗浮沈舉萬厯四十一年
進士授戶部主事時遼左餉中絕廷臣數請發帑不
報會廣東進金花銀善繼請於尙書借給之帝怒降
級調外光宗立復官尋改職方大學士孫承宗理兵
部事推心任之及督師表爲贊畫布衣羸馬出入亭
障間與將卒相勞苦承宗倚之若左右手其拓地四

百里收復數十城堡善繼籌畫爲多承宗謝事善繼亦移疾歸崇禎初遷太常少卿復告歸與門人講學從遊者日衆九年

大清兵攻定興善繼佐長吏守禦城破不屈死贈大理卿諡忠節子化麟舉天啓初鄉試第一伏闕訟父忠踰年亦卒

畿輔通志列傳

鹿善繼字伯順定興人祖久徵御史以言事謫父正
遠近稱鹿太公善繼端方謹愨由萬厯四十一年進
士授戶部主事內艱除起故官遼左餉中絕廷臣數
請發帑不報會廣東進金花銀善繼稽舊制金花儲
庫備各邊應用乃奏記尙書李汝華曰與其請不發
之帑何如留未進之金汝華然之帝怒奪善繼俸一
年趣補進善繼以死爭乃奪汝華俸二月降善繼一
級調外汝華懼卒補銀進泰昌改元復原官典新餉

連疏請帑百萬不報天啓元年遼陽陷以才改兵部
職方主事爲尙書崔景榮草疏請罪且請逮治逃將
御史游士任馬逢臬詆善繼爲小臣善繼抗疏辯請
卽日出署帝不許高攀龍薦善繼剛毅請以職方兼
御史督輦下保甲教民忠義旨允行竟不果大學士
孫承宗理兵部事推心任之及閱視關門以善繼從
出督師復表爲贊畫倚之若右手吏部缺司官羣
欲挽善繼善繼曰軍中無苦樂但問所從誰相公一
日在師中某當一日在幕中承宗嘗云予居東拓地

四百里敵退七百里無一不出伯順經畫而口不言
功功亦不及在關四年累進員外郎郎中承宗謝事
善繼亦告歸先是楊左之獄起魏大中子學泚左光
斗弟光明先後投鹿太公家太公客之與所善義士
容城舉人孫奇逢謀持書走關門告其難於承宗承
宗善繼謀偕巡視薊門請入覲闈黨大譁謂閣部將
提兵清君側嚴旨阻之獄益急五日一追賊擄掠甚
苦正急募得數百金輸之而兩人者則皆已斃矣至
是善繼歸而周順昌之獄又起順昌善繼同年生善

繼又爲募得數百金入而順昌又斃閹黨居近善繼家難家子弟僕從相望於道正曰吾不懼也崇禎元年逆璫旣誅善繼起尙寶卿遷太常少卿管光祿丞事再請歸九年七月

大清兵攻定興善繼家在江村白正請入捍城正許之與里居知州薛一鶚共守守六日而城破善繼死家人奔告正正曰嗟乎吾兒素以身許國今果死吾復何憾事聞贈善繼大理卿諡忠節敕有司建祠子化麟舉天啓元年鄉試第一伏闕訟父忠踰年亦卒

定興縣舊志列傳

鹿善繼字伯順賦形瓌偉少卽嶷然無溫飽意諸生
日布袍草履謁一泉范先生語次以做人爲柄大服
佩之終世賢書后曾以義憤要容城孫孝廉奇逢了
邑不平事萬厯癸丑登第主戶部山東司事與其僚
袁世振籌天下鹽法議皆不刊內艱歸以籽粒爲邑
百年害爲之籌十載經百折竟得改折徵復補河南
司會遼餉告急廣東金花銀適至奮然持議發遼神
宗震怒鐫級謫外大臣臺省力爭不報徑歸泰昌登

極首復其官尋改兵部職方念時事孔棘大法不伸
痛心疾首率同官耿如杞等代大司馬崔景榮草疏
丙云乞將臣速正典刑某逮某斬某戴罪以彰國憲
神宗半爲允行御史馬逢臬劾以小臣無忌憚疏辨
卽日出署詔趣還部愈一時持法士氣賴以振未幾
從孫高陽閱榆關師時擬用之銓部力辭與孫高陽
密畫恢遼疆四百里車營成高陽決策渡河同善繼
入奏時魏璫新竊柄有言高陽且興晉陽甲者璫恚
謀減兵以掣之高陽得請善繼亦罷去崇禎改元誅

璫召爲璽卿懷靖節歸來圖以登車曰不敢負也旋擢少奉常管勳丞事己巳冬東師西下善繼建議起高陽出馬世龍於獄畀將篆卒以復城清塞功第一有短狐欲射之引疾歸與同志講學江村夷然不屑也其學從餘姚折衷伊洛出入朱陸歸宿於做人一言以做人爲人生根本以希賢希聖希天爲做人規模以正心誠意爲做人把柄以知恥爲做人機竅以視聽言動爲做人所藉以通天下之關津以非禮奉承軀殼爲自壞其人者又一意實踐神嘗內守故不

屑屑與古今人角同異滋議論其見卓哉丙子殉城
朝廷贈大理卿予祭葬廕子典極渥核品行也不專
以死事善繼道德風節海內所瞻獨文筆知之者鮮
范橘州鈔而敘之擬諸歐陽子西蜀陳太史盟深韙
之

鄉賢事實

一善繼端方謹愨巋然如斷山小章句薄温飽慨然
有必爲聖賢之志故能崛起北方倡明絕學以做
人爲人生根本以希賢希聖希天爲做人規模以

正心誠意爲做人把柄以知恥爲做人幾竅以視
聽言動爲做人所藉以通天下之關會以非禮奉
承軀殼者爲自壞其人生平一意實踐神常內守
不屑屑與古今人角同異滋議論爲一家言孫徵
君奇逢敘理學宗傳自董江都以至善繼謂爲理
學中之子靜伯安又敘忠臣自方正學以至善繼
謂與高景逸劉念臺同以理學而兼忠節載其行
誼語錄極詳所著有認真草四書說約認理提綱
尋樂大旨塵譚無欲齋詩各若干卷行世

一遭母夫人喪慟幾絕勺水不入口者七日父正數
抵喪次勉以大禮始有起色席塊三年哀毀侵溼
終身步蹒跚人稱其至孝

一任戶部河南司主事暫署廣東司事時兵餉缺大
臣請還金花銀於計部不許會廣東解金花銀至
善繼遂奏記於大司農曰每歲廣東金花銀恭進
大內此近例也頃督部有扣留之議此時仍進大
內則部議終成畫餅欲徑解太倉則俞旨艱如拔
山莫若借發爲便如干宸怒願以身甘罪大司農

疏聞詔鑄一級補外不得朦擢閣部臺省交章申
救俱不報善繼因兩疏乞休亦不報候命兩閱月
徑歸直聲動天下

一任職方時一意持法大司馬輟部事行邊請用廢
弁張思忠爲將思忠故猾吏也爲姦宄都市中善
繼與同官耿如杞力執不可揆地擬旨切責有司
官豈得違阻之語耿謝病不起善繼乃上書首揆
曰本兵在部其所爲有與功令不合者方且事事
爭執何獨行邊而不可且言莫予違可以喪邦天

子且容廷臣之獻納何獨行邊而不可勿謂能違阻之職方爲易得勿謂去能違阻之職方爲小失也侃侃而諍首揆不堪其言然事竟格是時言有職方無大司馬朝陽鳴鳳庶幾似之

一在農曹時督圍政清冒破數百緡於閹豎之手幾及禍不避典新餉嚴立章程解者至自封識寄於庫領者至卽面衡以交之官爲持平而不爲出入羨餘盡絕吏亦不得上下其手司農以主庫爲脂此法立便如水矣常題聯於署云官有私瞞不過

吏不怕對天對地對神明則怕對吏士無恥成不
得人謾言做聖做賢做豪傑只言做人其忠挺清
勤可謂上不負君而下不負所學

一細大兼營到處修明職掌起升奉常卿管光祿丞
事物望既高士論攸歸猶勤於吏事如初服官時
清麻連三百餘金張北倉米八百餘石苟裨公家
不辭嫌怨

一職鹽法與其僚袁世振精心鹽筴爬梳利病洞悉
原委所著有粵東八閩鹽法議皆不刊

一孫公承宗輟綸閣視師善繼請從朝議欲居之銓
曹力謝曰善繼鬢眉男子肯回頭作吏部郎乎人
服其恬孫公嘗云伯順在坐使人非幾盡杜儼若
嚴師其助我神明者不止謨謀矣至嚴饋遺絕請
託冷面辣手朝齋暮鹽尤古軍中所未有

一逆璫魏忠賢柄政樞輔入請對善繼從璫疑爲清
君側惡幾不免忠賢羅織清流楊左魏周相繼逮
封太常正舉義爲助破柱爲匿經紀周悉善繼聞
而又力助之益幾不免遂拂衣歸里時燕趙之士

皆階璫驟貴善繼獨與吳橋范公景文凜凜自持
堅卧不起天下咸曰悲歌慷慨之氣盡萃於二公
矣

一定興有地千餘頃窪讎不任犁鋤故永弗稅黠者
以獻勳戚璫豎奏請遂賦之於民以爲莊歲所徵
不登則以累其門且以累其鄉民盡烏獸散善繼
爲力言之當事求以折徵法寬之璫豎激宸怒禍
且不測善繼奮髯曰羅文恭不云乎此生活得干
人命甘心不向世外求慘淡經營者十餘載其事

終以濟十場之民咸尸祝之迎薰門外有籽粒折
徵碑至今存

一恬於仕進登第後蕭然無謁選意每日花樣不時
奈何入世勉起爲司農郎以發金花歸賜環贊樞
輔觸逆璫歸起升奉常尋移疾歸庶幾難進易退
者與

一究心理學教授生徒以紹往開來爲己任痛除將
就冒認影響浮游之病而一言一動觸處逢源說
約一編日與同人諄復口授四方來學者以數百

計舍不能容鄰居僧院幾無閒室彬彬有鄒魯風
一明末丙子秋七月定興破善繼死之子化麟具疏
請卹下部議內外諸司奏其生平大節爲一代理
學眞儒特贈大理寺卿廕子建專祠賜諡祭葬如
禮善繼爲人孝弟忠信明允篤誠辭受取予如水
之有防而不以一節加人是非可否如食之必吐
而不以一眚掩人以身命歸君父以心膽質鬼神
以深心冶鑄善人以至誠變化異類江村之上河
汾濂洛不是過焉畿南之士殖學修行鏃礪自好

知身月三系言
卷一三
三
者不問而知爲鹿氏之徒其道之不行而以完節
自見則天也生平道德風節詳載行狀年譜志傳
碑銘及史冊邑乘中

定興縣新志列傳

鹿善繼字伯順號乾嶽賦形瓌偉少卽嶷然讀王守仁傳習錄慨然有必爲聖賢之志萬厯四十一年進士授戶部山東司主事與其僚袁世振籌天下鹽法議皆不刊內艱歸以籽粒爲邑百年害爲之籌十載經百折得改折徵復補河南司遼餉告急廷臣請發帑不報適廣東金花銀至奮然持議發遼神宗震怒奪俸促補進善繼力爭乃奪尙書俸而降善繼一級調外遂歸泰昌登極復官尋改兵部職方主事念時

事孔棘大法不伸率同官耿如杞等爲尙書崔景榮
草疏請罪並請逮治逃將以彰國憲上爲允行者半
御史馬逢皋劾以小臣無忌憚抗疏辨卽日出署詔
趣還部未幾從孫承宗閱兵及督師榆關表爲參贊
擬用之吏部力辭魏忠賢新竊柄有言承宗入覲且
興晉陽甲者忠賢恚謀嚴旨阻之承宗得請善繼亦
罷崇禎改元忠賢誅詔爲尙寶卿懷靖節歸來圖以
登車曰不敢負也擢太常少卿管光祿寺丞事引疾
歸與同志講學江村九年七月

大清兵攻定興善繼入城守禦城陷死之贈大理寺
卿諡忠節

定興府志續記

卷一三

三

論

大節吳虹宏與善縣人...

盧象昇鹿太常傳

天啟壬戌余始成進士觀政於司馬時職方有名郎
二人一爲吳君涇夫一爲鹿君善繼吳風采映發鹿
淵然簡靜皆奕奕負人望未幾吳失身逆璫驟至卿
貳旋死西市鹿恬於仕進忠挺絕世卒殉封疆華岳
重泉豈不介於一念哉今見主上特贈鹿公爲大理
卿予諡賜祠猗歟盛矣爲作鹿太常傳公諱善繼字
伯順人稱之曰乾嶽先生國初自小興州徙於定興
神廟時有忠諫御史鹿公久徵公之大父也熹廟時

東南諸君子搆黨禍有挺身破家以救之事雖不果
海內競傳鹿太公正者公之父也公少而卓然自立
志於古人之學究心於國家典故經畫匡濟鯁鯁不
倦古貌莊端髭髯飄飄如仙人望而知爲偉人丙午
舉於鄉癸丑成進士退而芒屨布衣教授諸生無謁
選意每曰花樣不時奈何入世獨與孫徵君奇逢爲
莫逆交孫君一介不取六年廬墓眞孝廉也兩人相
得不可一世士魏忠節周忠介獨聞而訪之四人遂
訂交於楊忠愍祠下欵欵笑歌人不測也勉起爲司

農郎時神廟在御久士大夫相與愉愉頗結交飲宴
奄奄如曹李卽得嘉譽華選公獨反之曰講求於職
掌與同舍郎袁君世振精心鹽筴曰兵弱矣禍將起
救弱莫如強非富則不能強非鹽筴則不能驟富而
不病民故獨嗜之二君子鹽筴遂爲專門袁君領淮
鹺振百年之衰至今賴之公爲粵東八閩鹽法議後
之謀國者不能易也大司農察其貧使督圍政稍可
資以衣食公一無所問而清冒破三百緡於闡豎之
手幾及禍不避也未幾奉太夫人諱歸勺水不食哀

慕若孺子人稱其至孝服闋補故官暫署廣東司時
遼事起天下無兵兵苦無食一如公料遼餉絕事且
敗而大臣力請發帑不許請還金花銀於計部又不
許時廣東金花銀適解至公遂擅以應遼上大怒羣
閹聚而譟公安之急呼入衆且謂予杖公飲噉自如
至闕而羣閹闔扉留之使立解公寓意於司筦報曰
已發三日矣歸而勒之還公曰有可還安用借上謫
公去而勒大司農還內庫時直聲動天下公卿臺省
競爲之請公乞歸皆不報公竟不待報而歸菽水爲

養教授如平時有終焉之志光廟御極首復故官使
典新餉蓋是時司農仰屋無計驟加派於民幾倍於
惟正之供故別爲藏察廉吏以主之遂首以屬公公
爲立章程解者至自封識而寄於庫領者至卽面衡
以交之官爲持平而不爲出入一無所潤於其閒吏
亦不得上下其手司農以主庫爲脂此法立便如水
矣遼陽失察才吏以補職方時遂改主其事余故得
望見公公爲大司馬草疏請斬逃潰將若而人逮逗
留將若而人自請先正典刑以爲行法之本當是時

天下久無法聞此言皆震動而言者遂指摘之公又
力拄言者之口神廟時犯顏易而犯言路難公諤諤
不特朝陽之鳳矣時天下久不用兵將帥皆飲酒賦
詩以自飾無有知兵者而一經變故士大夫亦鼠竄
去公曰不獎往無以掖來也乃極頌戚大將軍繼光
之功請錄之而卹死事之監司高邦佐潘宗顏縣令
張振德以風焉大司馬王象乾以中樞行邊請用廢
弁張思忠爲將思忠故猾吏也爲姦宄都市中求要
人以干職方職方不可乃介要人而求行邊者公與

其正郎耿君如杞力持不可揆地擬旨切責公上書
首揆曰本兵在部其所爲有與功令不合者方且事
事爭執何獨行邊而不可且言莫予違可以喪邦天
子方容廷臣之獻納何獨行邊而不可勿謂能違阻
之職方爲易得勿謂去能違阻之職方爲小失也首
揆震怒公不變色事竟格是時言有職方無大司馬
上特簡孫公愷陽以輔臣涖部孫公違衆論辟逃臣
公曰邊事可爲矣遂從之閱榆關請換逃官逃將以
新耳目使畏法不畏戰事無不可爲蓋公在中樞一

意持法始終不變士氣賴以振云時朝議欲以爲銓
郎且以爲符丞公謝之曰使來丹徼之間不忘情於
此諸君子亦何所取而用之卒守常調四年邊人不
遷一階天下服其恬孫公恢遼四百里五城二十七
堡公謨謀之力爲多孫公且曰伯順在坐使人非幾
盡杜儼若嚴師其助我神明者不止謨謀矣孫公方
欲渡河恢遼而朝事中變逆璫魏忠賢爲政孫公入
請對以公從璫疑爲清君側惡幾不免而時又逮楊
左周魏公之太公舉義爲助破柱爲匿公益幾不免

時燕趙之士皆階璫驟貴公獨與今大司馬質公范公凜凜自持堅卧不起天下曰悲歌慷慨之風盡萃於二公矣今上御極首以公爲尙寶卿公逡巡兩年而後出登車之日懷靖節歸來圖以自勵曰不敢負也擢太常少卿管光祿丞事時物望旣高士論攸歸旦夕柄用公猶勤於吏事如初服官時清冒破銀米各數百計己巳冬都城戒嚴倉卒無可倚公獨以非起高陽孫公不可孫公出而四城復圍以解公功第一公獨引疾歸爲四書說約教授如曩時公之學本

於餘姚出入朱陸不爲一家言天下稱其躬行實踐
居七年都城再驚且至畿南公家於江村去定興一
舍其子解元化麟侍太公以避而身入孤城爲守邑
令病守禦凡六日不能支公從容就義被刃而死解
元亦不勝喪死於孝嗚呼烈哉士大夫爭頌於朝言
公生平大節不當徒以死事褒天子特贈公大理卿
廕子賜祠祭葬如禮且爲易名焉公之官亦遂與吳
涓夫等後死者且八載而相去若此當其時使有更
志焉其可易地皆然也可不勉哉故予與公甚疏獨

感而傳之

三皇五帝二贊普

卷之三傳狀

三

通回轉

孫奇逢理學宗傳鹿忠節傳

鹿善繼字伯順號乾嶽定興人祖久徵御史以言謫父正黨禍作傾身急左魏諸公難所謂鹿太公者也公性端方謹慤歸然如斷山少以祖父爲師小章句薄溫飽讀王文成傳習錄而契之慨然有必爲聖賢之志每與同儕談說經旨曲折盡變動中妙理同儕謂其能記憶也公對曰只是要醒如何要記醒的如何是我則由我而周程而孔孟而湯文堯舜無不覲面以相質六經四書皆我註腳夫豈有疑於心乎自

是而論交日盛萬厯丙午舉於鄉癸丑成進士與吳郡周順昌襍被蕭寺雞鳴風雨以節義相期勉選戶部山東司主事職鹽法與同舍郎某爬搔利病洞悉源委丁內艱毀幾滅性歸而遠邇來學者舍不能容鄰居僧院幾無閒室服除補戶部主事署廣東司事遼左方闕餉輒發金花餉遼神宗震怒公得謫一時省臺諸忠直大列無不爲公訟言者解官歸門人日益進每拈尋樂大旨爲及門談柄光廟御極首復公官典新餉廉直介立清操絕俗尋改兵部職方主事

題覆章奏時遼陽初陷中外洶洶公爲大司馬草疏
請逮某斬某以伸國法會王象乾以大司馬行邊因
用廢弁與職方郎耿如杞左職方持之力首揆葉福
清擬司官不得違阻之旨公上書福清白邊疆之壞
由於債帥中外諸貴人入其債而請求於職方職方
自愛其官不得不徇諸貴人之請今幸得一憂國奉
公不徇情面之人反奉不得違阻之旨胥天下以職
方爲市永無不債之帥者自此一言始勿謂能違阻
之司官爲易得勿謂去能違阻之司官爲小失也福

清謂其刺也怒已而屈服焉歲壬戌孫高陽以閣臣
理部事公舉手加額迄高陽自請督師公請從適吏
部缺司官羣欲挽公公不可曰軍中無苦樂但問所
從誰相公一日在師中某當一日在幕中高陽嘗云
予居東拓地四百里游兵可至七百里無一不出伯
順經畫而口不言功功亦不及僅以久次轉員外升
武選司郎中而忌高陽者百計阻之遂與高陽同歸
家居四年學力日充痛除將就冒認影響浮游之病
而一言一動觸處逢源說約一編日與同人諄復口

授崇禎初起公爲尙寶司卿升太常寺少卿管光祿寺丞事細大兼營到處修明職掌未三載復請告歸公做人做事一味認真學以認理爲主而言理卽在事上故其言曰讀有字書卻要識沒字理則公之自得可知矣先是神廟末年高景逸馮少墟鄒南皋講學京師同志者邀公聽講旣而聞相戒不言朝政不談職掌公曰離職掌言學則學爲無用之物聖賢爲無用之人矣遂不往後數年與景逸儻遇於朝房景逸恨相見之晚具疏薦公佐高陽丙子秋七月定興

被圍是時公移疾江村無城守之責毅然授兵登陴
守七日而城陷或挾刃逼公公不爲動遂死之當事
者以殉義聞詔贈嘉議大夫大理寺卿廕一子入監
讀書專祠賜諡忠節賜祠額忠烈子祭造墳所著有
四書說約認真草三歸草尋樂大旨認理提綱無欲
齋詩草若干卷行於世子化麟舉辛酉順天鄉試第
一伏闕訟父忠不勝喪死

孫奇逢明儒學案忠節鹿乾嶽先生傳

鹿善繼字伯順號乾嶽北直定興人萬曆癸丑進士授戶部主事遼左缺餉請帑疏皆不行會廣東解金花銀至先生與司農議劄納太倉轉發遼左而後上聞上怒降級調外任先生因移疾去金花銀者國初以備各邊之緩急俱解太倉其後改解內府宮中視爲私錢矣光廟御極復官改兵部主事司馬王象乾行邊請用廢弁之以贖敗者耿職方不覆司馬又請旨命司官不得違阻先生寓書福清爭之無以奪也

高陽以閣臣督師先生轉員外郎中皆在幕府高陽解兵柄先生亦罷歸家居四年崇禎初起爲尙寶司卿升太常寺少卿未三載復請告九年七月先生城守定興城破死之贈大理寺卿諡忠節先生讀傳習錄而覺此心之無隔礙也故人問其何所授受曰卽謂得之陽明可也先生與孫奇逢爲友定交楊忠愍祠下皆慨然有殺身不悔之志嘗寄周忠介詩云寰中第二非吾事好向椒山句裏尋首善書院之會先生將入聞其相戒不言朝政不談職掌曰離職掌言

學則學爲無用之物聖賢爲無用之人矣遂不往是
故先生之學頗近東林諸子一無攙和夾雜其斯謂
之狂狷歟

Blank columns for text.

方象瑛鹿忠節公傳

鹿善繼字伯順定興人先世自小興州徙定興之江村世有名畿輔祖久徵萬厯八年進士知河南息縣時詔天下均田各署上中下壤息獨以下田報部使者譙讓之久徵曰均田以紓民乃病民乎持初議益堅得無加賦而息田故額二萬八千頃至是占隱畢出溢田四千餘則以見賦通攤之田乃大均再補山西襄垣縣值旱荒民多流亡前令不時報以逋賦責存者久徵按籍除懸額七百戶民獲蘇而流亡復業

擢陝西道御史首言吏治在先責撫按大旱求言復
上省聖躬禁酷吏恤民隱三事巡按蘇松諸郡請移
督糧水利道駐江陰條上息刁訟等十六事皆見施
行方是時上以軍政考察不當罪兵部並斥南北科
道三十餘人御史馬經綸以爲言亦奪職久徵適還
朝上疏申救辭激切上怒謫判澤州久之遷滎澤令
未任卒父正字成宇久徵長子也少爲諸生以孝聞
性不解飲顧好客客常滿座爲人倜儻有道骨能急
人難至激於大義爲排解雖自棄其身家不恤年八

十餘卒人至今稱鹿太公云善繼端方謹慤少以祖
父爲師萬厯三十四年舉於鄉四十一年成進士投
牒歸江村桐城左光斗嘉善魏大中長洲周順昌聞
而訪之定交蕭寺中數歲始授戶部山東司主事精
心鹽筴爲閩粵鹽法議內艱歸服除補河南司署廣
東司事會廣東解金花銀至銀故隸司農供文武吏
俸萬厯後始入內庫遼左方用兵餉中絕大臣請出
之不允請帑又不允善繼言於戶部尙書李汝華曰
與其請不出之帑何如留未進之金如干上怒願以

身任汝華如其言疏請上怒奪善繼俸一年汝華欲
補進善繼奮曰司官以死生爭堂官以去就爭上意
卽堅未必不可回也廷謝日闔人闔扉勒索太倉銀
善繼飛書主太倉者劉榮嗣劉報曰發三日矣實未
發也詔責補還善繼復持不可曰有可還安用借請
以善繼言回奏死生惟命闔愕眙而去當是時上怒
不測人皆爲善繼危太公聞之掀髯曰臣子不當如
是耶緘口保身非吾兒事尋奉旨奪汝華俸善繼降
一級調外得山東鹽運司判官而金花銀竟補還矣

泰昌改元復原官典新餉盡斥諸耗羨陋規外解久
不至善繼歎曰芻糗不前安得成功然餉加於民民
窮又安得應抗疏請發帑百萬不報亡何遼陽陷以
才望改兵部職方司主事與同舍郎葉震生耿如杞
爲尙書崔景榮草疏請罪行閒將吏以伸國法廷議
多不便善繼上疏力爭復請錄故將戚繼光後恤死
事高邦佐等是時王象乾以大司馬行邊起用廢弁
張思忠等與職方耿如杞議不合如杞持之力有旨
責其違阻善繼上書首輔葉向高曰邊疆之壞由於

債帥請託今如杞不徇情乃以違阻罪之如國事何
勿謂能違阻之司官爲易得勿謂去能違阻之司官
爲小失也向高是之議得寢高攀龍爲都御史薦善
繼剛毅清約實心任事請以職方兼御史督輦下保
甲教民忠義有旨允行竟不果天啟二年大學士孫
承宗以閣臣理兵部事素重善繼善繼曰今日之事
惟更易逃官逃將使畏法不畏戰事乃有濟承宗然
其言請寘王化貞於法並劾治逃臣高出等承宗閱
視關門善繼從及出督師復表爲贊畫句稽將卒審

察營壘識馬世龍偏裨中薦之爲大將承宗在關拓地四百里善繼籌畫居多承宗嘗曰伯順在坐使人非幾盡杜儼若嚴師助我不止謨謀也其相引重如此十二車營成承宗巡昌薊將入賀聖壽因面奏機宜魏忠賢方用事有言樞輔將清君側者魏廣微以告忠賢矯旨促返鎮其黨李蕃等復議減兵省餉以掣之善繼移書極論皆不省時銓司缺廷議屬善繼善繼辭曰樞相一日在師中善繼卽一日在幕中主憂臣辱願同生死且已出門告天復回頭戀吏部諸

君亦安所用之承宗語善繼曰太宰以銓郎待君子
雖欲奪賢獨不憂太公匕箸乎善繼曰辭塞上就銓
司此常人所不爲家君范陽男子書來囑善繼從公
於邊老人爲汝加一飯公以常人目善繼顧忍以常
人目家君乎承宗改容謝之方是時忠賢大興黨禍
光斗大中順昌先後逮詔獄拷死皆坐贓追比三氏
子弟踉蹌至無敢留者率主善繼家太公爲之周旋
橐餽醵金應比善繼聞而又力助之人皆咋舌而鹿
氏父子不顧一時義聲動天下以久次轉員外郎遷

武選郎中承宗爲璫黨楊維垣等論劾屢疏請告善
繼亦引疾歸江村崇禎元年起尙寶司卿升太常寺
少卿管光祿寺寺丞事未三載復請告歸里九年七
月定興被兵善繼時居江村邑令請入城守親族勸
勿行善繼曰我雖無城守責每見士大夫非降則遜
吾所深恥遣子化麟奉太公避亂亟入城爲令部署
守禦凡六日城陷不屈死之家人奔告太公太公慨
然曰吾兒誓以身殉城今果然矣事聞贈大理寺卿
諡忠節仍建專祠賜祠額曰忠烈承宗爲詩六十四

首哭之已而高陽破承宗亦死善繼少嗜學得王文
成傳習錄慨然有必爲聖賢之志嘗與諸生論經義
人服其記誦善繼曰貴能醒耳豈必記醒得如何是
我則古聖賢皆覲面可質矣與容城孫奇逢以學行
相砥礪從遊者日益多每拈尋樂大旨教諸生大要
以認理爲主故節義經濟皆卓然有以自見子化麟
有文行舉天啟元年順天鄉試第一人伏闕訟父忠
不勝喪卒孫盡心亦舉崇禎中鄉試有名於時

計六奇明季北略

鹿善繼字伯順號乾嶽北直保定府定興縣人萬厯四十一年癸丑進士與吳郡周順昌吳橋范景文襍被蕭寺雞鳴風雨以節義相期也選戶部山東司主事懷宗立升太常少卿未三載告歸九年丙子七月大清兵破定興善繼方移疾村居念定興當涿南保北背障神京遂辭邱墓令子化麟侍父于鄉授兵登陴七日城破善繼守南門兵從西北隅上挾刃脅降善繼不可兵怒斫公三刀復射一矢而死明年正月

子化麟伏闕上書言臣父以無備之城必破之邑獨
堅誓死之心衡拒方張之敵不獨城存與存效勿去
之義抑欲人戰且守折南下之謀疏上下部部覆得
旨贈大理寺卿廕一子入監讀書專祠賜諡予祭造
墳恤終之典無不備蓋異數也是冬化麟亦以苦次
哀痛死善繼死時年六十有二甲申諡忠節賜祠額
曰忠烈

趙吉士續表忠記鹿忠節公傳

孫閣部當關鹿忠節善繼爲軍中贊畫其後在籍皆死國難云善繼字伯順定興人祖久徵由進士初令息縣時詔天下度田分署上中下壤息獨以下壤報上官屢卻之久徵曰度田以紓民乃病民乎執不移故額田二萬八千頃至是占隱畢出溢田四千餘頃則以現賦均派之闔邑民沾其利內艱服闋補襄垣先是歲旱荒民多流徙以逋賦責現戶民不堪久徵請除懸額七百戶而惟徵現在者民獲甦而流亡復

業擢御史出按蘇松條列杜刁訟禁火耗等十六事
嚴行之吏民丕變萬厯十四年還朝值上以軍政事
貶黜言官抗疏申救謫澤州判久之遷滎澤知縣未
任卒父正以貴公子砥礪節概縣令宋繼登欲與相
見方糞苗投鍤而避宋歎息有加禮逆闔時傾身急
諸君子之難所稱鹿太公者是也善繼履道坦坦惟
義是求少時讀王陽明先生傳習錄慨然有必爲聖
賢之志常過容城與孫孝廉奇逢擘脯酌酒定交於
楊忠愍墓下登萬厯癸丑榜與吳郡周順昌吳橋范

景文讀書僧舍交甚篤授戶部郎當是時遼左用兵
方亟邊兵缺餉至五月有餘勢且岌岌督師請餉之
疏屢上部無以應又請發帑復留中不報大農蒿目
而憂計無所出適廣東解金花銀至善繼奏記尙書
李汝華曰邊餉急若然眉與其請不發之帑何如留
未進之金督部有留扣金花之議若仍進大內則部
議終成畫餅欲竟解太倉則俞旨艱如拔山莫若一
面題知一面竟發遼左如干上怒願以身任尙書允
之中官傳嚴旨勒令補還且馳問太倉庫此銀安在

管庫主事劉榮嗣曰發三日矣實未發也復傳旨速補善繼曰有銀安用借無銀又安從補但執善繼語回奏死生有命不敢易隻字中官歎息而去遂降級調外秦昌卽位復原官典新餉盡屏諸耗羨時外解不以時至歎曰餉不以時士安得飽若派餉于民民窮又安能應抗疏請發帑不報再疏請又不報天啟元年遼陽陷推才望改職方爲尙書崔景榮草疏請逮治逃將有御史庇其私人疏刺之詆爲小臣善繼憤抗疏曰臣等固小臣御史豈大臣乎二百年來御

史氣燄橫絕朝端而曹郎昌言常居其半人各有品
不可輕也御史復有詬言善繼報曰天下不能爭者
威燄不可奪者是非不敢避者艱危不可喪者廉恥
御史好爲之卽日乞休不許樞部以撫賞行邊請用
廢弁之坐贓而敗者郎中耿如杞持之不肖覆奉旨
司官不得違阻善繼上書葉輔向高曰封疆之壞皆
由於債帥中外諸貴人入其賄請於職方職方不得
不徇諸貴人之請今幸得一憂國奉公不徇情面之
司官而反奉不得違阻之旨胥天下以職方爲市永

無不債之帥者自此一言始勿謂違阻之司官爲易
得勿謂去能違阻之司官爲小失也福清心服焉天
啟壬戌高陽閱關歸旣而自請督師題善繼爲贊畫
當關四年入而促膝密謀出而指使二三大帥實倚
爲左右手禁餽遺絕燕會朝夕相對泊然兩書生也
善繼又布衣羸馬出入亭障閒延見老校廢卒與相
勞苦每以稽察將士整頓營壘鼓勇敢拔跡弛錄寸
長棄小過爲事二十年來邊關名將咸高陽所甄錄
善繼贊之實多督師將渡河恢遼忌者議省餉減兵

以阻之善繼貽書部科曰今之言邊事者大端有二
一曰慎重一曰簡汰夫進取則當慎重振刷則宜簡
汰今之君子則慎重非爲進取而意在退怯簡汰非
爲振刷而意在隳兵總以行其阻撓之計夫百計而
鼓之進不能勝一言之退也三年而集此師不能供
一日之隙也不征不戰而去將去兵垂成之緒旣廢
前日之禍復作忠臣義士惟有負戟長歎而已吏部
司官缺太宰堅以屬善繼高陽亦勸其得朝夕侍太
公於京邸善繼慨然曰辭塞上就銓司此常人所不

爲也而謂善繼願之乎相公一日在師中某卽一日
在幕中善繼鬢眉如戟肯回頭作吏部郎乎家大人
范陽男子書來囑善繼好從公於邊老人爲汝加一
餐矣相公以常人待善繼猶可而竟以常人待家大
人乎卒不赴已而左魏之獄起皆平日道義交太公
又伉俠仗義復得周吏部順昌手書爲魏公子學泚
下榻并留僉憲之弟左光明於莊上而容城孫奇逢
亦與左魏成莫逆交太公亟遣其孫化麟奇逢令其
弟奇彥與白溝義士張果中走關門上書閣部善繼

爲閣部謀借巡視薊門請入覲闖黨咸言閣部提兵
清君側謀出於善繼嚴旨阻之獄益急太公爲兩人
拮据輸贓或有危之者太公曰不知命無以爲君子
二公急來投我而中道畏阻不獨衰朽不齒於人我
子亦何顏立於天地間乎捐募共得數百金甫運至
京兩人已斃杖下逾年而周吏部又至善繼已從關
門歸里與吏部同年生臭味夙投借募四出復得數
百金金入而吏部亦斃闖黨李朝欽與太公比鄰三
君子之子弟親友居者行者絡繹於途逆闖耳目甚

近禍且不測而太公之氣彌銳骨彌勁祖孫父子與
孫氏兄弟奔馳籌畫心力俱枯卒亦無所連染天贊
之耳崇禎初歷升常少復告歸九年七月

大兵圍定興善繼念地處涿南保北背障神京遂辭
邱墓留子化麟侍太公於莊上而身自授兵登陴守
南門七日城破有挾刃索其衣者不應連斫三刀復
中一矢而死家人奔告其父父慨然曰吾兒素以身
許國今何憾明年正月公子化麟伏闕上書得旨優
卹贈大理卿諡忠節賜祠額曰忠烈死時年六十有

二化麟先中天啟辛酉解元至是以哀痛卒善繼死
後二年閣部亦闔門俱死

趙吉士曰余讀乙丙紀事所載鹿氏一堂三世與孫
氏兄弟三人皆以義動於中不避險阻是當於古人
中求之而公之死節尤烈矣

Blank manuscript page with vertical columns.

陳鼎東林列傳

鹿善繼字伯順定興人先世自小興州徙定興之江村世有名於畿輔祖久徵萬曆八年進士知河南息縣有聲擢陝西道御史以敢言稱巡按蘇松諸郡皆以直聲著父正字成宇久徵長子也少爲諸生以孝聞性不解飲顧好客客常滿座爲人倜儻好奇能急人難至激於大義力爲排解雖自棄其身家不恤年八十餘卒人至今稱鹿太公云善繼端方謹慤少以祖父爲師萬曆三十四年舉於鄉四十一年成進士

投牒歸里桐城左光斗嘉善魏大中長洲周順昌聞而訪之定交蕭寺中數歲始授戶部山東司主事精心鹽筴爲閩粵鹽法議內艱歸服除補河南司署廣東司事會廣東解金花銀至銀故隸司農供文武吏俸萬厯後始入內庫遼左方用兵餉中絕大臣請出之不允請帑又不允善繼言於戶部尙書李汝華曰與其請不出之帑何如留未進之金如干上怒願以身任汝華如其言疏請帝怒奪善繼俸一年汝華欲補進善繼奮曰司官以死生爭公以去就爭上意卽

堅未必不可回也廷謝曰闔人闔扉勒索太倉銀善
繼飛書主太倉者劉榮嗣劉報曰發三日矣實未發
也詔責補遣善繼復持不可曰有可還安用借請以
善繼言回奏死生惟命闔愕眙而去當是時上怒不
測人皆爲善繼危太公聞之掀髯曰臣子不當如是
耶緘口保身非吾兒也尋奉旨奪汝華俸一月善繼
降一級調外得山東鹽運司判官而金花銀竟補還
矣泰昌改元復原官典新餉盡斥諸耗羨陋規外解
久不至善繼歎曰芻糗不前安得成功然餉加於民

民窮又安得應抗疏請發帑百萬不報亡何遼陽陷
以才望改兵部職方司主事與同舍郎葉震生耿如
杞爲尙書崔景榮草疏請罪行間將吏以伸國法廷
議多不便善繼上疏力爭復請錄故將戚繼光後卹
死事高邦佐等是時王象乾以大司馬行邊起用廢
弁張思忠等與職方耿如杞議不合如杞持之力有
旨責其違阻善繼上書首輔葉向高曰邊疆之壞由
於債帥請託今如杞不徇情乃以違阻罪之於國事
何勿謂能違阻之司官易得勿謂去能違阻之司官

爲小失也向高是之議得寢高攀龍爲都御史薦善
繼剛毅清約實心任事請以職方兼御史督輦下保
甲教民忠義有旨允行竟不果天啟二年大學士孫
承宗以閣臣理兵部事素重善繼善繼曰今日之事
惟更易逃官逃將使畏法不畏敵事乃有濟承宗然
其言請置熊廷弼王化貞於法并劾治逃臣高出等
承宗閱視關門善繼從及出督師復表爲贊畫句稽
將卒審察營壘識馬世龍偏裨中薦之爲大將承宗
在關拓地四百里善繼籌畫居多承宗嘗曰伯順在

坐儼若嚴師助我不止謀議也其相引重如此十二
車營成承宗巡昌薊將入賀聖壽因面奏機宜魏忠
賢方用事有言樞輔將清君側者魏廣微以告忠賢
矯旨促返鎮其黨李蕃等復議減兵省餉以掣之善
繼移書極論皆不省時銓司缺廷議屬善繼善繼辭
曰樞相一日在師中善繼卽一日在幕中主憂臣辱
願同生死且已出門告天復回頭戀吏部諸君亦安
所用之承宗語善繼曰太宰以銓郎待君子雖欲奪
賢獨不憂太公七箸乎善繼曰辭塞上就銓司此常

人所不爲家君范陽男子書來囑善繼從公於邊老人爲汝加一飯公以常人畜善繼顧忍以常人畜家君乎承宗改容謝之方是時忠賢大興黨禍光斗大中順昌先後逮詔獄拷死皆坐贓追比三氏子弟踉蹌至無敢留者卒主善繼家太公爲之周旋橐餽釀金應比善繼聞又力助之人皆咋舌而鹿氏父子不顧一時義聲動天下以久次轉員外郎遷武選司郎中承宗爲璫黨楊維垣等論劾屢疏請告善繼亦引疾歸崇禎元年起尙寶司卿升太常寺少卿管光祿

寺丞事未三載復請告歸里九年七月

大清兵攻定興善繼時居江村邑令請入城守親族
勸勿行善繼曰吾雖無城守責每見士大夫非降卽
遜吾所深恥遣子化麟奉太公避亂亟入城爲令部
署守禦凡六日城陷大罵不屈死之家人奔告太公
太公慨然曰吾兒誓以身殉城今果然矣事聞贈大
理寺卿諡忠節承宗爲詩六十四章哭之已而高陽
破承宗亦死善繼少嗜學得王守仁傳習錄慨然有
必爲聖賢之志旣而與攀龍光斗等交遂得程朱之

傳嘗與諸生論經義人服其正又與容城孫奇逢以
學行相砥礪從遊者日益眾至不能容僦鄰比僧舍
居之每拈程朱大旨教諸生大要以認理爲根主敬
爲本故節義經濟皆卓然有以自見子化麟有文行
舉天啟元年順天鄉試第一人孫盡心亦舉崇禎中
鄉試有名於時外史氏曰先生父子周旋東林被難
諸賢可謂竭盡其心中流砥柱矣况乎節義經綸見
之實事迥然不同於敗腐書生也乃天不厭亂遂使
攫城而死不能大其功業悲夫

Blank manuscript page with vertical columns.

劉青芝明代人物志鹿太常傳

鹿善繼字伯順定興人父正少爲諸生縣令請與相見方糞田投鍤而避縣令歎息逆闔時營救楊左諸公所謂鹿太公者也善繼舉萬曆丙午鄉試癸丑成進士授戶部主事內艱除起故官遼左方闕餉請帑疏皆不報會廣東解金花銀至善繼奏記尙書李汝華與其請不出之帑何如留未進之金如干上怒願以身任汝華如其言疏請上怒奪善繼俸一年勒令補還汝華不敢違善繼力持不可廷謝日中官闔門

扉不聽善繼出勒問太倉云何主太倉劉榮嗣報曰
發三日矣實未發也中官傳嚴旨促令補還善繼復
持不可曰有可還安用借請以善繼言回奏死生惟
命當是時上怒不測人皆爲善繼危太公聞之掀髯
曰臣子不當如是耶緘口保身非吾兒也尋有旨奪
汝華俸善繼降級調外得山東運判遂移疾去而金
花銀竟補還矣泰昌元年復原官典新餉改兵部職
方司主事是時遼陽初陷中外洶洶善繼受事誓天
淚流浹面杜絕請託申明法紀爲尙書崔景榮草疏

逮某斬某以申國法法不能行請自臣始言官羣譟
之善繼抗疏力爭無以難也職方耿如杞與大司馬
王象乾持議不合有旨責其違阻善繼上書首輔葉
向高言違阻之司官不易得去違阻之司官非小失
向高謂其刺己也怒已而屈服焉天啟二年大學士
孫承宗以閣臣理兵部事承宗清嚴果毅以天下爲
己任顧重善繼善繼亦委心焉承宗閱視關門善繼
從及出督師復表爲贊畫時銓司闕廷議屬善繼善
繼不可日相公一日在師中卽一日在幕中主憂臣

辱願同生死鹿善繼髯鬚如戟肯回頭作吏部郎乎
承宗語善繼獨不爲太公匕箸計善繼曰家君范陽
男子書來囑善繼從公於邊老人爲汝加一餐公以
常人畜善繼顧忍以常人遇家君乎承宗改容謝之
善繼與承宗相得甚朝齋暮鹽漠然兩書生也布衣
敝馬出入亭障閒延見老校退卒與相勞苦因以句
稽將士察識營壘鼓勇敢拔跡弛善繼之功也承宗
當關四年經營遼河東西恢復遼疆四百里安插遼
人四十萬入而造膝密畫出而指授二三大帥實倚

善繼爲左右手承宗嘗曰伯順在坐儼若嚴師助我不獨謀議也其相引重如此以久次轉員外升武選司郎中承宗解兵柄善繼亦引疾歸矣崇禎元年起尙寶司卿升太常寺少卿管光祿寺寺丞未三載復請告歸里九年七月

大清兵攻定興善繼時居江村邑令請入城守或勸勿行善繼曰我非不知孤城難守老親當念誠不忍桑梓當存亡之會朝廷無仗節之臣遣子化麟奉太公避亂遂辭邱墓死守七日而城陷身被三刃一矢

而死太公聞之哭而歎曰吾兒誓以死殉城今果然矣事聞贈大理諡忠節當己巳年大兵薄城也善繼昌言於朝曰非急召承宗出馬世龍於獄無能辦此者先是善繼物色世龍於羣帥中薦之承宗推轂爲大將及承宗再鎮手復四城以還朝廷世龍之功爲多談者謂善繼能知世龍世龍不負承宗而善繼與承宗果能相與以有成也及善繼死城守承宗哭之痛爲挽詩六十四章又二年承宗亦殉國談者謂承宗善繼與遼事相終始而善繼又與承宗相終始云

善繼天性純孝母旣歿念太公獨處共臥起者二十
年其子亦訓行孝謹四世一堂更衣并食雍雍穆穆
如也自少嗜學慨然有必爲聖賢之志里居教授生
徒以百數至舍不能容先是神廟末年高景逸馮少
墟鄒南臯講學京師相戒不談職掌善繼曰離職掌
言學則學爲無用之物聖賢爲無用之人矣故其學
以認理爲主而言理卽以事徵凡其所言皆躬之所
行也一時從遊之盛熙然有河汾濂洛之風畿南之
士殖學修行鍊礪自好者不問而知爲鹿氏之徒也

卒年六十有二子化麟天啟元年鄉試第一赴闕頌
父忠拜疏歸待命苦次哀痛不勝喪而卒

論曰善繼鄉舉過容城與舉人孫奇逢酌酒切脯定
交楊忠愍墓下成進士日桐城左光斗嘉善魏大中
長洲周順昌聞而訪之同心矢志蕭寺中及光斗大
中順昌罹閹禍繫獄拷比三氏子弟與奇逢奔走營
救皆主善繼家太公爲之謀橐餽釀金錢善繼助之
人皆咋舌而鹿氏父子毅然不顧一時義聲動天下
昔徐晦不負楊臨賀必不肯負國善繼以林居之散

吏死朝廷以江村之間身死城守而必不肯乞生苟
免以負國也固可於傾身急友朋之難不顧死生禍
福決之此墓下定交蕭寺矢志諸公他年成仁取義
之烈烈也已兆於此矣或謂投閒村居之善繼聞難
而遁豈不足以保身全節乎彼其意蓋不僅爲一城
死義也殆爲天下大義死忠耳嗚呼難哉

馬時芳鹿江村傳

鹿江村善繼字伯順定興人祖久徵御史以建言謫
父正傾身急左魏諸公難所謂鹿太公者也先生性
端方謹慤巋然如斷山少以祖父爲師小章句薄溫
飽讀王文成公傳習錄而契之慨然有必爲聖賢之
志萬曆癸丑成進士選戶部主事解官歸光宗立復
官壬戌孫高陽以閣臣自請督師先生請從時吏部
缺司官羣欲挽先生先生不可曰軍中無苦樂但問
所從誰相公一日在師中某當一日在幕中高陽嘗

曰吾居東拓地四百里敵退七百里無一不出伯順
經畫而口不言功功亦弗及忌高陽者百計阻之遂
與高陽同歸崇禎初起爲太常寺少卿未三載致仕
先生生平事事認真學以認理爲主理卽在事上謂
讀有字書要識無字理先是高景逸馮少墟鄒南皋
講學京師同志者邀聽講旣而聞相戒不言朝政不
談職掌先生曰離職掌言學則學爲無用之學聖賢
爲無用之人矣遂不往離事講學奚足以應天下事
哉此世儒之通病也丙子秋七月東兵薄定興是時

先生移疾江村無城守責毅然授兵登城守七日城陷死之詔贈大理寺卿專祠予祭葬諡忠節著有四書說約認真草行於世子化麟舉辛酉順天鄉試第一伏闕訟父忠不勝喪死

論曰鹿江村辭吏部佐高陽危疆拓地四百里勳績懋焉及致仕悠然如將終身卒以捍禦孤城殉國而死又何其壯烈也總之皆理學之分著道固貫顯晦存歿而一焉者也宋史特立道學傳竊議何以不入韓忠獻范文正而文忠烈先儒稱其理學深邃亦不

入毋亦各取其所最著者列焉比類屬辭史氏之體
然與江村以忠節著夏峰輯入理學宗傳可云克稱
昔吾夫子謂天下國家可均爵祿可辭白刃可蹈中
庸不可能觀於江村先生故無所不可而亦何不能
之有使夫子見之當不復作嘸噓

予讀江先生此不謂亦
以江先生此不謂亦
以江先生此不謂亦
以江先生此不謂亦

定興縣舊志列傳

鹿化麟字石卿善繼子生有夙慧德器穆然自童子至諸生試輒爲首登辛酉榜第一人乃竟無名士氣公子氣北海亭義問狹海內所納客皆化麟與朝夕宋給諫玫薦其學行應聘堅辭不就奉常丙子難徒跣請卹以毀沒北海亭集八卷行於世

鄉賢事實

一化麟生於有道之家一切塵氛未經點染苦志下帷不窺戶外中天啟辛酉鄉試第一天性孝友德

器穆然宋給諫政以品行卓越具疏薦徵檄相望
辭不赴時稱爲徵君所著有北海亭集行世

一忠節公講學於江村戶履恆滿不及接者化麟分
而教之輔仁一社領袖羣英共以大道相切劘張
南軒父子後僅見者

一生有夙慧讀書目數行下博學能文名冠畿闈乃
竟無名士氣謙沖樸澹不露光芒人莫測其涯際
一祖正蠲貲修學宮化麟殫力經營之復爲募引辭
指淋漓無不人人樂助所費不貲備極巍煥縣志

載其文

一乾坤北海亭爲化麟下帷處數椽結茅不髹不繪
傍惟園蔬幾色灌木兩行爾乙丙閒複壁釀金義
問浹海內所納客皆化麟與朝夕事急冒暑馳赴
榆關謀所以救左魏之策無何二公死復與祖正
經紀其櫟車高陽孫少師贊之曰舉家貪於爲善
旨哉言乎

一省親渝水有大弁於道中餽兼金者卻之厲忠節
公聞而掀髯曰眞吾子也其清凜四知有如此

一 邑令胡公嘉桂有惠政忠節公倡邑人建祠祀之
與邑人士約先登第者置祭田辛酉榜甫發化麟
卽蠲金置地五十餘畝春秋割牲以祭至今不絕
一 風格玉立望而知爲公輔器仕茲土者爭欲效款
而嚴冷性成全無請託咸以爲可望不可卽云
一 內穎外淵飲人以和而持己特峻遠聲色屏貨利
鄉人對之亦無敢談折柳話攫金者

一 化麟偉幹美髯幾同庾信痛父死慘烈晝夜長號
嘔血匍匐詣闕請卹膚削色墨右肩頹兩耳腊步

蹣跚欲傾竟不勝喪死聞者人人泣下咸方之魏
孝子學泚云孫徵君奇逢敘北海亭集曰忠孝兩
倫父子分據各以勢會適然行所無事初無矜名
矜節之心此其粹然盎然完其所以爲子卽完其
所以爲人又何恨阨於年而功業未見於世哉范
銓部士楫感而傳之稱其樹惇道義德器穆然殆
威鳳以九苞奇而匪以丹穴奇者僉稱曰允品行
文藝並詳縣志

此

夫

夫

夫

夫

夫

夫

夫

定興縣新志孝友傳

鹿化麟字石卿善繼子生有夙慧自童子至諸生試輒居首天啟元年鄉試第一北海亭所納客皆化麟與朝夕給諫宋玫薦其學行堅辭不就省親榆關有大弁餽兼金峻卻之以父殉城徒跣上疏請卹哀毀而歿

范士楫鹿解元傳

天下風氣樸於北不亟聲譽萬厯中迺有諸生時卽以文章譟公卿之口者自定興鹿仁卿始其爲人也外淵內穎曾大父侍御膝置語客曰吾家徐陵也因名化麟云十四歲時予大甫雲中公於侍御款見其文大驚謂才跨其父侍御笑曰卽其父亦云就邑令試萊陽宋公繼登海內負人鑒者拔君第一予亞之宋公命寫其文數百本邑故孔道輶軒至輒投之以兩童爲地瑞由是聲颿起試草一出鈔將貴紙郡國

之游看且填巷牛炙私於前輩豸使題爲功人辛酉
之役傾都慶首科得名士無以作解元爲仁卿幸者
楊戶曹筆其事略謂賓興歌鹿鳴勸駕仁卿姓可書
麟趾啟周今元士應運仁卿名可書久期冠冕今果
哀然解額其俊才可書未三十其早貴可書而翁乾
嶽適負公望爲少司馬其道濟可書祖成宇先生方
嚴高潔沖然居鼎盛其德業可書先生母王太君年
八十有二子斑衣孫執戟曾孫冠多士元孫讀等身
書其慶澤可書侍御抗疏爭臺諫判澤州少司馬引

誼留金花判鹽鐵祖孫骨鯁一轍少司馬召拜今秩
往不可禦顧侍御莫逮則又報施於厥曾元其淵源
可書長安傳而韙之乙丑璫禍起左魏皆奉常之死
友時奉常幕榆關成宇公開北海亭內其子弟倡義
醵金爲援及二公斃杖復經紀厥廣柳甘株坐如飴
由是奉常父子義問塞天壤不知營複壁走危關始
終此舉者仁卿力居多渝水道中弁有饋兼金者卻
之厲奉常聞而掀髯曰眞吾子也西吳茅元儀幕贊
孫高陽高陽觸璫解兵柄修卻者借茅傾之茅兵胸

俠膽詞人之雄顧妒者欲殺而君毅然爲主亭邊垂
柳一兩人婆娑其下憤吒古今鈞銖聲律無虛夕計
茅蓋三客是亭云己巳疆事隕奉常引疾歸講性命
經濟之學戶屢恆滿不及接者君分而教之張南軒
父子後僅見者會宋給諫玫以品行卓越具疏薦催
檄相望君不欲一節成名遂不赴丙子邑陷聞父變
於容城慟幾絕少蘇縋城夕奔斂殯如平時禮訖迺
匍匐詣闕陳情曰臣父起家進士筮仕農曹以借發
金花被謫光廟賜環改補樞部天啟閒贊輔臣幕畫

於山海忤逆璫荷蒙龍飛起升尙寶尋升太常寺少
卿予告回籍村居去城三十里奉親課子不入城市
忽本邑告警非不知孤城難守老親當念誠不忍桑
梓迫存亡之會朝廷乏仗義之臣單車入邑則見土
堞初完隍池正涸烏合未練枵腹不果兼以邑令嬰
疾而邑政奏成於令幕軍法不振於鄉紳亦旣鞠躬
終遭掣肘此時臣父惟誓身與城存亡而已七月廿
七日臣父親守南門鼓厲各面欵東北隅陷眾潰不
支臣父端坐被刃而死痛維臣父念邑當涿南保北

宜若睢陽之障江淮且年來多故忠義風微人思倖
免故獨堅必死之心眾厲無生之氣捧一璞以塞驚
波藉杯水而撲烈燄以投閒之吏爲朝廷以抱病之
身爲梓里臣父之散地空拳力竭死義與關臣王肇
坤之乘驄擁笏事裂死官其忠則同而臣父更苦假
令人盡臣父一隅可保九塞可甯是臣父爲一城死
義爲小爲天下大義死忠爲大也旨下所司議卹歸
候聖次君偉幹廣頽美髯脣如渥丹腰帶積然幾同
庾信奉諱以還則膚削色墨右肩頽兩耳腊步蹒跚

欲傾蔬食日不兼甌其叩闈時予一見以爲憂踰小
祥果以鬱毀歿人誰無死君之死死孝足矣甯以人
間之四十有六論春秋哉予與君少日俱爲宋公所
賞堂命之締姻後君冢嗣盡心室於長女蓋伐柯乎
尹蹇修乎文尋盟乎總角異矣戰則迭雄出爲連璧
徵逐文章倡予和女者垂三十祀每一篇成郵筒相
命晨恆停櫛披函夕或索火讀字雖逢他譽弗算賞
音摘及片疵登時塗乙自始交迨沒齒無纖芥之嫌
奚啻勿相軋而已所著北海亭集詩文各若干卷予

刻之晉陽憶諸生就郡試卸鞍命酷耳熱後握臂言
志也君欲樹惇道義予猶沾沾於氣節文章今較之
君雖未霑國命而廉隅修飭器業穆然水之冰生於
寒人之冰生於正介君側曾有傾仄之容媿褻之詞
偷薄之行可容於君者卽鄰若里曾有傾仄之容媿
褻之詞偷薄之行不恐聞於君者若是則君志不盡
讐然見端矣予所期願無百一副君不死予亦未必
死而卽死異日儻促膝如平生也當若爲謝君吾友
杜隱君越君至友也實聞此語

贊曰居恆意不滿者有三綦焉一高第綦厥眉軒厥
趾翹什伯中可暗索也君靜以溫與寒峻鈞禮操兔
園冊就之談娓娓不倦卽具掌故達國體從無僂言
於先輩一公子綦世所稱五陵豪胥敗子爾君知溫
貂勁鷗歟錦泥金距歟斷鄉登壟歟乃至室絕秀媵
館靡憇子足不識墓陵耳不聞雁柱公庭私尺如山
亦有鹿解元赫蹠否一文人綦神厲志凌病非媵理
湯熨可及君天子黻繡舞勺落筆驚人家有賜書濡
首不節發爲文辭春容纈栗敘事本左國揆情類賈

董詩則有麗則無麗淫詩妖正熾嶽嶽獨矜體裁蟻
視餘子然文酒高會他人懸河爭霸君第視衡向壁
際不一語古稱馮異之班功徐羨之觀彝得君而三
不甯惟是蓬麻之說中士謂榮上士謂慝迹君之風
義蓋威鳳以九苞奇而匪因丹穴奇者也况於阿閣
乎

畿輔通志列傳

鹿盡心字靜觀明大理卿善繼孫化麟子少承家學
通經術中崇禎九年舉人任山西安邑知縣邑俗豪
侈嚴除陋習風爲之變時上官督墾甚厲乃力請緩
令民自爲墾他邑峻於奉法民多逃亡獨安邑得無
恙諸生某負富商值不受追索自縊死商持萬金求
免卻其金論如法年五十一卒囊無餘資民醵金爲
助立祠祀之康熙間祀鄉賢

定興縣新志列傳

鹿盡心字靜觀善繼孫化麟子少承家學通經術領
丙子鄉薦順治初任山西安邑知縣邑俗豪侈嚴除
陋習風爲之變時上官督墾甚厲乃力請緩令民自
爲墾他邑峻於奉法民多逃亡獨安邑得無恙諸生
某負富商直不受追索自縊死商持萬金求免卻其
金論如法年五十一卒囊無餘資民醵金爲助立祠
祀之康熙間祀鄉賢

鄉賢事實

一公諱盡心世籍保定府定興縣中丙子科舉人任山西平陽府安邑縣知縣家傳忠孝性秉寬仁孩幼時逮事高祖母曾祖祖父母父母能先意承志無弗得其歡心天倫樂事極一時之盛洎祖忠節公殉難又奉父孝子解元公之諱手攜三弱弟上食曾大父封太常公淚隨匕落奉養祖母王氏母孫氏甘旨豐備愛敬肫然筮仕已久值祖母稍不怡猶丙夜長跪必色喜乃已襄葬極兩附之誠人皆稱孝

一友愛諸弟推讓撫教備至祖大理公廕秩有爲大宗諷者公悽然曰余少稟先訓名義大關聞之已悉業徼庇鄉書又何忍祖若父代血椎心之慘先吾子而後弟且奚慰曾大父衰年一慟乎卒以子其弟洗心聞者稱之

一公義方之誨極嚴文行並勵不少寬假諸子旣長爲博士弟子最有聲者一事不當立加訶責故爭自奮勉皆成材至甥姪輩慈育教誨無異己子婚嫁皆爲經理祿俸所入分惠無私

一勤思祖德手輯家訓一編上自光祿迄於孝子郵
筒寸楮無非相勉以盡倫盡道孫徵君先生以爲
是編也可以教慈可以教孝可以教忠可以教義
眞名教干城也

一拯恤里黨大力苦心本邑地撥兌獻縣者類委以
不毛卽可耕又抗弗予租公率邑人白諸大吏會
勘三載始定除課我租之例經費八百餘金皆出
公一人捐備

一公輕財嗜義戚友間有匱急者恆不待告而周之

其慷慨蓋天性云

一兩任司鐸教思誠懇先行誼而後文章經造就者多顯名於世如陳宗精先生輩粹然理學尤最著稱

一任涿州學正時學使程公芳朝疏薦其品格端方學行優裕原任大學士馮公稔知其才優幹濟且識兵機有乃祖忠節公遺風薦爲軍前參謀公力辭不赴其恬於仕進如此

一任安邑值上官督墾甚厲公力請緩其事令民量

力爲墾日積月累臻成功他邑峻於奉法民展轉
逃亡熟者反荒上官乃獎公爲式

一公執法如山苞苴盡絕任安邑日有諸生負富商
債不堪追索自縊死商故豪不欲就獄行萬金求
免幕客或爲之請公曰斯言胡至哉渠罪不至抵
而死者之憤待令爲伸生平所學何事乃當官昧
之耶吾有七子納其賄不過各分千餘金而禍已
隨之矣立責吏還其金卒論商如法
一公憐才若渴邑有童子王寬兩世孀嫠共守此子

貧無卓錫地而高才嗜學公識拔置第一時學使
陋例邑各分賄進一名名曰酬棚可獲千金公獨
以寬當之次舉卽聯捷官編修甚有名而公知人
之明亦略見於此

一清真簡樸絕遠塵囂安邑俗故豪侈公一鎮以淡
靜凡衙署張鐙設戲及妓女參候之例一切痛絕
侈豪之習爲之一變

一公方嚴謹飭雖小不苟爲令時幼子無乳疲羸日
益甚家人議覓乳母公曰吾爲地方官而使民婦

入衙不可也但食牛乳足矣其古致如此

一勤於吏治理繁劇邑無一事不經心經目或勸其
節勞自頤公歎曰每聞吾祖恨不得爲親民吏吾
幸當其任顧偷惰自安不惟負 朝廷且慚祖德
矣晝夜勤劬竟以勞悴致疾卒於官

一歷任以清白自守令安邑地故膏美公纖毫無所
取惟務勤修職掌俾勿忝先世家風卒於官僅能
歸櫬諸子凍餒且不免數載勞塵空囊如洗殆所
謂蹇蹇匪躬者歟

一經學深邃論著甚多詩古文詞卓然作者書法更
精妙絕倫

畿輔通志列傳

鹿賓字鳴嘉康熙二十一年進士知湖南桂陽縣知縣會有丈量之令賓令民自丈而親履之不數日事畢而民不擾巡撫請開礦賓力陳不便事得寢擢陝西道監察御史協理山東道事有請慎選教職簡用知府復舊制錢救山東荒等疏兩巡西城掌浙江道賜御書七言絕句寵之以事罷歸仁廟萬壽賓祝闕下

詔復其官

賜尙方所製砥石山硯一方以章異數云卒祀鄉賢

定興縣新志列傳

鹿賓字鳴嘉康熙二十一年進士知湖廣桂陽縣除里長輪差弊會有丈量之令賓令民自丈而親履之不數日事畢而民不擾撫臣議開礦賓力陳不便事得寢擢陝西道監察御史協理山東道事疏請慎選教職簡用知府復舊制錢救山東荒等事兩巡西城令行禁止旋掌浙江道賜御書七言絕句寵之以事罷歸

聖祖仁皇帝六十萬壽賓祝闕下

詔復其官

賜尙方所製砥石山硯一方以彰異數云卒祀鄉賢

鄉賢事實

一公諱賓爲安邑公第四子中康熙壬戌科進士歷任掌浙江道事陝西道監察御史生有廟堂之度自襁褓絕不逆父母意弱冠而孤奉寡母生養死葬盡哀盡禮丁內艱年已望六猶躡踊不食形體毀瘠同官李質君先生謂公嗣聖模曰吾觀尊父一哀則點點是血獨不虞滅性乎

一公友愛諸弟養育教誨皆使成材事長姊極敬撫孤姪有恩弟妹婚嫁禮儀周備嘗曰父母之心在是苟不以爲心縱日費三牲烏云養乎遊宦時旣分俸諸弟猶泣然涕曰兄弟不聚首何以爲歡念至輒遣人數千里迎之相見則雍雍怡怡天趣橫流有孩提景象

一初任桂陽令首除里長輪差大弊自輸納正供外絲毫無所費歲省民間數萬金錢請於上官勒石垂後

一編審戶丁具有法簡要明白民不敢欺又無苛責之弊人皆便之

一興學更化實德誠心每課士甲乙鼓舞丙夜不倦鄉試捐給路費士子感激爭自濯磨相繼奪魁文風丕變又請廣學額以收人才上官皆爲允行

一監放兵餉屏絕陋規時集營將兵目較射懸銀牌爲的中者與之兵各習射若不及有參將以偏私致兵譟者上官慮成大患公自請治之立行解散一公禱雨立應桂陽嘗苦旱公輒割俸易米賑民之

饑閉閣齋祓夙興步禱精誠所感立沛甘霖

一公力止開礦不貪厚利消患於未萌

一教民稼穡桂陽多水田而賤棄山田公召民種麥親至田間慰勞又俾還倉以一麥抵兩穀民爭種之利遂大興

一奉文丈量便民省費桂陽山邑千巖萬壑清丈實難公神明默運謂邑人曰而各丈而田吾事畢矣及報冊畢集乃閒往抽丈量額允符民無勞費荒田未盡墾者他邑迫嚴檄率報熟公獨曰熟則熟

荒則荒累民便官吾弗爲也卒以實上

一公廉潔剛方絕不取民以媚上爲令八年倉庫無
一絲一粒虧闕每三月一造交盤冊曰吾所以爲
此期於朝罷而夕就道耳以故上下之間其賢者
旣感於秉彝之好不肖者亦知葉視一官而非勢
力所能屈也

一爲御史前後條奏甚多如請慎選教職簡用知府
以及錢法救荒等疏皆究極根本可大可久非徒
屑屑抉摘細事以爲直

一公清執法凡核擬會審無不細心推求情理期無
冤濫有回民命案揮金求脫獄獨公不爲之動論
抵如法聲震京師諸所爲類是

一兩巡西城令行禁止不畏強禦執法一破情面寬
行戶禁差派表孝義崇學校嚴賭博飭番捕所部
盜賊絕迹發奸摘伏抑強扶弱凡有益於民者無
不以身任之時情交際一概謝絕

一凡遇會議理所不可直言駁正卽大僚弗顧以是
招忌遂被中傷優游林下者十年癸巳春

皇上知公素清直

特旨復還原職蓋異數也

一公未仕及里居無念不爲鄉里省徭薄賦前後賢
令所除陋規多感公言而爲之者

一學術醇茂日以學行砥礪及門掇甲乙及有名於
時者甚衆

一居鄉安靜食貧守約足迹不及公門有司造廬請
謁辭謝不得已一再見所訪諸利弊皆爲慷慨言
之期有濟於物薄於自奉衣冠僕馬弊陋荒簡見

者不知其爲達官也

一公端方勁直磊落光明古貌古心與人交不歧面背見義所當爲奮然爲之從不以利害阻至梓里事有不平輒爲正言極論至以身捍之雖顛頓弗恤也

一生平落落恆閉門卻埽在臺日門可羅雀塵常滿案日食豆腐豆芽友人戲呼爲二豆御史所許可甚嚴縱意有極契亦無多往還終月不拜一客其常也家居日門高風峻被接見者鄉黨稱榮

一公雅負人倫鑒取舍人物恆以一言定其終身數
十年後驗如操券

一著述甚富皆原本正學力閑詭僻之習學者傳鈔
甚盛而不以付梓嘗曰斯道無有窮極一息尙存
所造日異豈可遽灾梨棗爲他時之悔乎所見之
卓如此故遺藁數十卷皆藏於家

定興縣新志文學傳

鹿聖權字書田性孤峻嫉惡特嚴立身教家不失尺寸讀書能探精蘊講孔門四勿箴親切有味以維持風化爲鄉大夫之責邑有三節婦貧而微倡義爲請旌屢舉鄉飲大賓不就舉孝廉方正復遜謝不耐塵俗惟書史花木自娛嘗以菊沁茶作詩云人淡淡如菊菊清清自香此中有真味人菊兩相忘可想見其高躅矣

定興縣志列傳

鹿聖敬字孟寅盡心孫康熙戊子舉人知江西分宜
縣事廉幹有爲循聲卓著

Blank text columns within the main frame.

後醍醐天皇

畿輔通志列傳

鹿謙吉字後村盡心孫雍正元年進士授廣東增城知縣下車首嚴陋規派供之禁凡訟必量道里遠近定限傳訊兩造無守候之苦胥吏不得爲奸調合浦時邑南背陰山聚盜百餘剽劫出沒恃巖壑爲逋逃藪捕者無敢入謙吉訶知密率兵壯冒雪往緝以智擒其黨害盡除創建海角亭書院以課生童旋呈吏議去以禮部尙書王安國薦奉旨發往江南補鳳臺知縣捍水災請賑濟士民感頌

立生祠祀之罷歸里居十餘年卒

定興縣新志列傳

鹿謙吉字後村盡心孫雍正元年進士授廣東增城知縣下車首嚴陋規派供之禁凡訟必量道里遠近定限傳訊兩造無守候之苦胥吏不得爲奸調合浦時邑南背陰山聚盜百餘剽劫出沒恃巖壑爲逋逃藪捕者無敢入謙吉訶知密率兵壯冒雪往緝以智擒其黨害盡除創建海角亭書院以課生童旋呈吏議去以禮部尙書王安國薦奉旨發往江南補鳳臺知縣捍水災請賑濟士民感頌

立生祠祀之罷歸里居十餘年卒

畿輔通志列傳

鹿承祖字慎菴少孤事母孝中乾隆六年舉人乙丑
明通榜授山西沁水縣知縣平疑獄修義塾嚴保甲
課農桑民風翕然內艱服除起陝西藍田令以才望
調長安首邑清釐積案以勞卒官民立祠祀之並置
祀田若干畝

定興鹿氏三續譜

卷十三

三

定興縣新志列傳

鹿承祖字慎菴賓孫少孤事母孝苦志讀書年十五游泮稱異等乾隆辛酉舉於鄉乙丑明通進士授山西沁水令平疑獄修義塾嚴保甲課農桑民風翕然內艱服除選山西藍田令以才望調長安首邑清理積案循名卓著尋以勞瘁卒於官士民立祠祀之並置祀田

定興縣志

續編

卷十三

雜

畿輔通志列傳

鹿邁祖字南皋性沈靜雍正八年進士授翰林院編
修奉

命宣諭秦中會大雪有餽輕裘一襲者卻不受尋遷
福建道監察御史巡視中西兩城遇事執法敢言擢
禮科給事中遷吏科都給事簡湖南督糧道嚴旗丁
夾帶斗斛浮收之弊運價出入歲數十萬羨餘亦以
萬計任者皆飽私橐邁祖不啟封悉以歸國用乾隆
九年攝臬篆尋奉

命調川北道遷按察司副使時值金川之役念士卒
勞苦捐廉俸爲犒賞藥餌資并贍其家口軍士益奮
旋奏調永甯以言事獲譴罷歸蕭然儒服貧至乏食
時議廉之

定興縣新志列傳

鹿邁祖字南臯賓孫聖權子性沈靜雍正庚戌進士授翰林院編修奉

命宣諭秦中會大雪有餽輕裘一襲者卻不受尋遷福建道監察御史巡視中西兩城遇事執法敢言擢禮科給事中遷吏科都給事簡湖南督糧道嚴旗丁夾帶斗斛浮收之弊運價出入歲數十萬羨餘亦以萬計任者皆飽私橐邁祖不啟封悉以歸國用乾隆九年攝臬篆調川北道遷按察司副使時值金川之

役念士卒勞苦捐廉俸爲犒賞藥餌資並贍其家口
軍士益奮旋奏調永甯以言事獲譴罷歸蕭然儒服
貧至乏食時議廉之

定興縣新志列傳

鹿師祖字廓亭賓孫乾隆乙丑進士性情豪邁岸然
自異任山西樂平令以清慎自矢量移洪洞廉俸外
毫無所取理繁治劇措置裕如未幾引疾歸

Blank manuscript page with vertical columns.

畿輔通志列傳

鹿荃字馥園盡心曾孫父泰吉字訥齋乾隆三年舉人官文安教諭大吏重其才嘗札訪地方利弊秩滿考異等荃磊落有遠志乾隆三十年拔貢爲諸生時家窶甚館同邑耿姓家耿長者雅重荃歲暮解館歸贈米數斗置鏹其中荃抵家見鏹遽走反之遇鬻女者母女泣於途卽以鏹贖之問姓字不答明歲見耿堅請以修脯抵官三河縣訓導以捕蝗授山西靈石知縣調永濟知縣四十八年擢絳州知州時汾水嚙

城爲巨患荃建長壩防水民名曰鹿公隄感其德也
四十九年升江蘇鎮江知府明年夏旱江南北饑荃
籌賑全活萬億江口有救生船故事救死者賞倍於
生每江風覆舟比救出生者恆少荃審其原以貪死
者賞重故遲之乃反其賞活者甚衆總督特薦

純廟召見奏對稱

旨授浙江糧道遷兩淮鹽運使卒著有鹿氏家譜十

三卷

定興縣新志列傳

鹿荃字馥園盡心曾孫父泰吉字訥齋乾隆三年舉人官文安教諭大吏重其才嘗札訪地方利弊秩滿考異等荃磊落有遠志乾隆三十年拔貢爲諸生時家窶甚館同邑耿姓家耿長者雅重荃歲暮解館歸贈米數斗置鏹其中荃抵家見鏹遽走反之遇鬻女者母女泣於途卽以鏹贖之問姓字不答明年見耿堅請以修脯抵官三河縣訓導以捕蝗授山西靈石知縣調永濟知縣四十八年擢絳州知州時汾水嚙

城爲巨患荃建長壩防水民名曰鹿公隄感其德也
四十九年升江蘇鎮江知府明年夏旱江南北饑荃
籌賑全活萬億江口有救生船故事救死者賞倍於
生每江風覆舟比救出生者恆少荃審其原以貪死
者賞重故遲之乃反其賞活者甚衆總督特薦

純廟召見奏對稱

旨授浙江糧道遷兩淮鹽運使卒著有鹿氏家譜十
三卷

畿輔通志列傳

鹿嗣宗字錫堂官浙江松陽知縣邑有巨猾資吏胥
爲羽翼嗣宗廉得之置於法調餘姚邑爲王守仁故
里祠在龍山之麓率諸生講學其中絃歌之聲達旦
不輟以卓異擢海甯州知州州故繁劇徵漕十萬出
納之際吏夤緣爲奸嗣宗除其不便者民受其惠而
國課益贏攝東塘海防同知築塘工受代還州值亢
旱跣足禱雨中暑暴卒

[Faint vertical text columns, likely bleed-through from the reverse side of the page]

定興縣新志列傳

鹿嗣宗荃子字錫堂官浙江松陽知縣邑有巨猾資吏胥爲羽翼嗣宗廉得之置於法調餘姚邑爲王守仁故里祠在龍山之麓率諸生講學其中絃歌之聲達旦不輟以卓異擢海甯州知州州故繁劇徵漕十萬出納之際吏夤緣爲奸嗣宗除其不便者民受其惠而國課益贏攝東塘海防同知築塘工受代還州值亢旱跣足禱雨中暑暴卒

定興鹿氏二續譜

卷十三

夏

定興縣新志列傳

鹿亢宗荃第三子號怡亭嘉慶辛酉拔貢選良鄉縣訓導署南宮以贅儀爲陳姓葬十餘柩道光元年援例授廣東定安知縣邑境孤懸海外民多梗頑而生黎尤桀驁亢宗寬猛兼濟胥感化焉調順德縣亦瀕海盜賊出沒靡常捕得巨盜寘於法捐廉添設巡船乃稍綏靖暇則課士龍山先行後文丁亥署澳門同知地爲西洋人寓居防範撫綏尤力以丈量沙田遲延被議引見復原官選授湖南黔陽知縣未任卒

[The main body of the page contains several vertical columns of text, which are extremely faint and illegible in this scan. The text is organized into approximately 10-12 columns, separated by vertical lines.]

國史列傳

鹿丕宗直隸定興人由拔貢生充鑲紅旗官學教習
期滿以知縣用道光十二年分貴州十五年補施秉
縣知縣二十一年擢平越州知州二十四年升都勻
府知府咸豐元年以苗疆俸滿

賞加道銜四年二月兼護貴東道十二月獨山州匪
徒煽亂拒捕撲城丕宗督兵勇進剿殲擒首逆巡撫
蔣蔚遠上其功請寬免失察處分仍下部議敘

允之五年九月桐梓餘匪勾結黔西土匪竄擾大定

等處丕宗會合官弁夾擊殲其渠餘匪肅清奏入
賞戴花翎十月所屬都江廳城陷革職留任十一月
丹江廳營陷

諭仍留都勻府本任以觀後效時下游台拱苗匪連
陷數城漸逼都勻境其龍里貴定兩邑教匪合攻府
城丕宗募勇登陴親歷各門指揮督戰閒出奇兵邀
擊之殺賊甚多並訪獲城中匿賊悉誅之以忠義激
士民人皆感泣困守年餘糧盡援絕六年城陷死之
妻蕭氏自焚死時丕宗已卸任十有八日矣貴州提

督孝順等奏

聞得

旨開復革留處分交部從優議卹尋

賜卹如例

賞騎都尉世職襲次完時以恩騎尉世襲罔替並准
於原籍建立專祠同治七年巡撫張亮基以丕宗循
聲素著忠節可嘉奏請

予諡建祠

諭曰咸豐六年間貴州苗教各匪攻陷都勻府城知

府鹿丕宗與妻蕭氏闔門殉難業經奉

旨優卹並准本籍建祠

茲據張亮基奏稱該故員服官貴州所至士民愛慕
在都勻任內十有餘載卓著循聲迨賊匪攻陷府城
該故員業經交卸誓以身殉忠節可嘉等語鹿丕宗
著加恩予諡並准於貴州各任所建立專祠其隨同
殉難之家丁孫福李壽黃元僕婦周趙氏李王氏婢
女冬桂一併附祀以彰忠烈尋

予諡壯節子傳霖進士廣西桂林府知府孫瀛理龔

世職刑部主事

三
其
臣
元
二
寶
海
事

卷
一
三
傳
狀

三

畿輔通志列傳

鹿丕宗字簡堂嘉慶十八年拔貢授知縣道光十二年揀發貴州到黔七日適開州有逆案囚未得前牧獲罪無敢代大吏委丕宗至不逾月囚就擒前官免戍大吏以功歸他人丕宗亦卒不言功知施秉縣霽雨爲災居民漂沒丕宗發倉施粥全活萬計署桐梓縣甫下車斷一疑獄闔邑稱神時溫水邪教初發密捕之賊不敢犯巡撫賀長齡奏擢平越州知州權台拱廳事台拱居亂山中素爲盜藪丕宗微行密訪獲

巨盜百數人悉杖殺之苗民駭伏二十四年升都勻府知府三十年粵西髮逆陷河池思恩諸城將寇都勻荔波獨山六硯平浪等屬均戒嚴丕宗馳往度形勢修碉卡練鄉兵更誘降人爲偵遂擒逆首朱三何大及黨百餘人賊乃東竄境獲安咸豐二年護貴東兵備道秋教匪游二踞山穴中糾衆千人謀通粵寇丕宗潛率兵擣其巢掩捕之生執匪首游二林鳳儀五年遵義賊楊鳳由安順竄攻麻哈丕宗督兵往援賊聞宵遁丕宗追及黃平州之重安江賊急渡多死

鳳旋就擒奉

旨賞花翎是年下游苗叛台拱苗首作亂巡撫議撫
丕宗請曰撫非計也不若以破楊鳳之師還擊之必
勝然後諭以大義使獻其首餘皆免死彼必懾服則
逆首可得黔地可安也今彼方聚黨肆行不加以威
而遽言撫不惟不知恩反以我爲怯必不受撫待其
不受而用兵則曠日持久羽翼成矣不納苗果不聽
奪城戕官勢益熾時滇川及本省兵皆撤去巡撫始
悔急徵兵兵未至賊連陷數城逼勻郡鄉團與戰不

利時城中兵僅二百餉亦匱苗擾於西龍里貴定教
匪起於東合攻府城丕宗設守備更募民訓練之令
一軍駐城外與城上相犄角登城督戰左右多中礮
死不爲動城東有山設哨其上伺賊動靜屢出奇兵
擊之輒大勝賊不能攻乃分衆據谷硎絕糧道援兵
不能進城中食盡死亡相繼丕宗以忠義激勵士民
拊循殘羸衆咸願死守六年七月被圍已歲餘矣援
兵始至總督恆春復惑於人言謂勻境無賊遂檄援
兵他往丕宗請留兵兼陳賊勢爭之再不聽且摘其

任後十八日賊乘夜急攻城遂陷丕宗與其妻蕭氏
焚死奏入奉

旨照三品例議卹

恩給騎都尉世職

國史立傳敕建專祠祀昭忠祠諡壯節

定興縣新志列傳

鹿丕宗字簡堂荃第五子由拔貢教習授知縣道光十二年揀發貴州到黔七日適開州有逆案囚未得前牧獲罪無敢代大吏委丕宗至不逾月囚就擒前官免戍大吏以功歸他人丕宗亦卒不言功知施秉縣霪雨爲災居民漂沒丕宗發倉施粥全活萬計署桐梓縣甫下車斷一疑獄闔邑稱神時溫水邪教初發密捕之賊不敢犯巡撫賀長齡奏擢平越州知州權台拱廳事台拱居亂山中素爲盜藪丕宗微行密

訪獲巨盜百數十人悉杖殺之苗民駭伏二十四年
升都勻府知府三十年粵西髮逆陷河池思恩諸城
將寇都勻荔波獨山六硐平浪等屬均戒嚴丕宗馳
往度形勢修碉卡練鄉兵更誘降人爲偵遂擒逆首
朱三何大及黨百餘人賊乃東竄境獲安咸豐二年
護貴東兵備道秋教匪游二踞山穴中糾衆千人謀
通粵寇丕宗潛率兵擣其巢掩捕之生執匪首游二
林鳳儀五年遵義賊楊鳳由安順竄攻麻哈丕宗督
兵往援賊聞宵遁丕宗追及黃平州之重安江賊急

渡多死鳳旋就擒奉

旨賞花翎是年下游苗叛台拱苗首作亂巡撫議撫
丕宗請曰撫非計也不若以破楊鳳之師還擊之必
勝然後諭以大義使獻其首餘皆免死彼必懾服則
逆首可得黔地可安也今彼方聚黨肆行不加以威
而遽言撫不惟不知恩反以我爲怯必不受撫待其
不受而用兵則曠日持久羽翼成矣不納苗果不聽
奪城戕官勢益熾時滇川及本省兵皆撤去巡撫始
悔急徵兵兵未至賊連陷數城逼勻境鄉團與戰不

利時城中兵僅二百餉亦匱苗擾於西龍里貴定教
匪起於東合攻府城丕宗設守備更募民訓練之令
一軍駐城外與城上相犄角登城督戰左右多中礮
死不爲動城東有山設哨其上伺賊動靜屢出奇兵
擊之輒大勝賊不能攻乃分衆據谷硎絕糧道援兵
不能進城中食盡死亡相繼丕宗以忠義激勵士民
拊循殘羸衆咸願死守六年七月被圍已歲餘矣援
兵始至總督恆春復惑於人言謂勻境無賊遂檄援
兵他往丕宗請留兵兼陳賊勢爭之再不聽且撤其

任後十八日賊乘夜急攻城遂陷丕宗與其妻蕭氏
焚死奏入奉

旨照三品例議卹

恩給騎都尉世職

國史立傳敕建專祠祀昭忠祠諡壯節

畿輔通志列傳

鹿傳先字進軒道光五年舉人以知縣分發江西署
德興知縣權南昌丞會清江縣民聚眾抗漕勢張甚
中丞檄攝其任先是漕廠有浮收積弊官吏均漁之
而邑之一都七都民最悍歲開倉不逞之徒必糾黨
恫喝狃爲故常傳先至廉其情密獲其魁痛治之散
黨羽滅其浮收眾帖服邑之蕭家湖水數爲患築長
隄捍之民建生祠以祀調贛縣夏大水民廬多漂沒
流民億萬食維艱發常平倉平糶同官謂宜請而後

行傳先曰贛距省千餘里往返經月皆餓殍矣苟活民吾甘任咎先發後報猶不給守道有積穀匿不出力請弗許傳先強發之以市價歸其值道怒曰強項令欺我然亦不能罪也調廬陵擢南昌同知署廣信府知府餘干縣煤匪滋事縣令以民變報巡撫檄傳先發兵往剿傳先曰山中居民以胥吏苛斂積怨而發百餘村不皆亂民也遽進攻必併力死拒勝之則多殺無辜不勝則激巨變不如親往諭之以散其黨使民不助亂則亂者可得矣乃一輿一僕往至山口

衆持械擁進傳先大呼曰吾前德興知縣鹿傳先也
速來前吾活汝衆驚伏於道因令導入山徧諭利害
衆皆感泣甫三日卽用村民擒煤匪三十餘人治罪
餘悉不治二十八年卒

一

八

日

八

定興鹿氏二續譜

定興縣新志列傳

鹿傳先字進軒嗣宗子道光乙酉舉人以知縣分發江西署德興知縣權南昌丞會清江縣民聚眾抗漕勢張甚中丞檄攝其任先是漕廠有浮收積弊官吏均漁之而邑之一都七都民最悍歲開倉不逞之徒必糾黨恫喝狂爲故常傳先至廉其情密獲其魁痛治之散黨羽滅其浮收眾帖服邑之蕭家湖水數爲患築長隄捍之民建生祠以祀調贛縣夏大水民廬多漂沒流民億萬食維艱發常平倉平糶同官謂宜

請而後行傳先曰贛距省千餘里往返經月皆餓殍矣苟活民吾其在咎先發後報猶不給守道有積穀匿不出力請弗許傳先強發之以市價歸其值道怒曰強項令欺我然亦不能罪也調廬陵擢南昌同知署廣信府知府餘干縣煤匪滋事縣令以民變報巡撫檄傳先發兵往剿傳先曰山中居民以胥吏苛斂積怨而發百餘村不皆亂民也遽進攻必併力死拒勝之則多殺無辜不勝則激巨變不如親往諭之以散其黨使民不助亂則亂者可得矣乃一輿一僕往

至山口衆持械擁進傳先大呼曰吾前德興知縣鹿
傳先也速來前吾活汝衆驚伏於道因令導入山徧
諭利害衆皆感泣甫三日卽用村民擒煤匪三十餘
人治罪餘悉貸之二十八年卒

人帝聖德...

...

...

...

江西通志循吏傳

鹿傳先字進軒直隸定興人舉人道光中以知縣分
江西委理讞局以善折獄稱署德興令權南昌府同
知會清江民聚衆抗漕傳先往攝令事至則密獲其
魁痛懲之而減積年官吏浮收之數民大悅服事立
辦十四年補長甯調知贛縣治水災不俟請發穀以
賑捕盜明賞罰善駕馭役不參盜行旅以安調廬陵
擢南昌府同知二十一年署廣信府事時海氛不靖
頻有警報傳先增練勇儲守禦捐俸修城民恃以無

恐餘干煤匪滋事抗差毆官糾眾據山口縣令以民
變聞傳先奏檄率兵往察知由胥吏苛逼謀於軍將
挈一僕往諭眾持械蜂擁至傳先大呼曰吾前德興
令某也速來前吾活汝眾愕眙旋跪於道因令導入
山徧諭村眾悉撤備甫三日村民擒首從三十餘人
以獻不血刃而難平督撫以循良疏薦未入
覲遽卒

定興縣志

畿輔通志列傳

鹿傳斌字儀軒有氣節咸豐三年從兄傳洵爲河南
睢州知州粵逆犯境傳斌率勇迎擊或止之傳斌曰
吾爲忠節後得致命王事夫何憾力戰死之同治初
奉

旨旌卹入祀昭忠祠

官署職入

辛

官為成道者為受命于天

雖州賦州夢茲始賦州

出觀則宅始刊言錄於

絲綸志

定興縣新志忠節傳

鹿傳斌字儀軒有氣節咸豐三年從兄傳洵爲河南
睢州知州粵逆犯境傳斌率勇迎擊或止之傳斌曰
吾爲忠節後復致命王事何憾力戰死之同治初入
祀昭忠祠

定興府志卷十三
三

定興縣新志列傳

鹿恂理字仲如篤於孝友髫齡能詩道光庚子舉於鄉任涑水訓導以先行後文課士謂人不可輕視秀才而秀才之自待尤不可輕士皆敬服會涑民與縣令構難聚衆數千幾成大獄恂理曉以大義咸俯首謝過事遂解其誠信素孚如此年四十七卒



定興鹿氏二續譜卷十三

The main body of the page contains vertical columns of text, which are extremely faint and illegible due to fading or low contrast. The text appears to be organized into columns separated by vertical lines.

